

**Sterilitas consensu ac autoritate illustris medicorum ordinis in celeberrima  
Salana / [Johann Michael Bertuch].**

**Contributors**

Bertuch, Johann Michael, active 1683.  
Fasch, Augustin Heinrich, 1639-1690.  
Universität Jena.

**Publication/Creation**

Jenae : Literis Krebsianis, [1684]

**Persistent URL**

<https://wellcomecollection.org/works/bfdwm544>

**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

51

# STERILITAS

consensu ac autoritate  
Illustris Medicorum ordinis  
in celeberrima Salana  
sub praesidio

## AUGUSTINI HENRICI FASCHII, D.

Anat. Chirurg. & Botan. Prof. Publ.

Architri Ducalis Saxonici b.t. Decani,

*Patroni, Praeceptoris, Promotoris ac  
Hospitis etatem suspiciendi,*

**PRO LICENTIA**

summos in arte medica honores & privilegia

*Doctoralia legitimè capessendi,  
ingenuo eruditorum examini submittitur*

JOHANNE MICHAELE BERTUCHIO,  
Gothano,

in auditorio majori,

horis ante & pomeridianis,

*ad diem Febr. an. clc Icc LXXXIV.*

---

J E N A,  
LITERIS KREBSIANIS.

Serenissimo Principi ac  
Domino,

# DN. FRIDERICO

Duci Saxoniæ , Juliaci , Cliviæ &  
Montium , Landgravio Thuringiæ , Mar-  
chioni Misniæ , Principali Dignitate Comi-  
ti Hennebergiæ , Comiti de Marcâ & Ra-  
vensburgo , Dynastæ in Ravenstein  
& Tonnâ ,


*Domino Meo Clementissimo ,*

Exercitium hoc Inaugurale ,  
humilimam animi mentem  
declaraturus

*offerō*

*Serenissimæ Ipsius Celsitudinis*

subjectissimus servus

Johannes Michael   
Medicinæ Doctorandus.

## PROOEMIUM.

**F**uit *Arellius*, ante Augusti tempora, Romæ pictor celebris, nisi flagitio insigni corrupisset artem. Semper enim alicujus fœminæ amore flagrans, Deas pingebat dilectorum imagine. Itaque in picturis scorta numerabantur. Vereor, ne idem mihi contingat, atque probro ac dedecori vertatur, quod juvenis adhuc, & in foro medico diu nondum exercitatus, ejusmodi affectum, SPECIMINIS INAUGURALIS loco proponendum selegerim, in cuius explicatione partes, quas natura in sequiori sexu aliàs occultare amat, detegere, deque iis, paulò liberius repetitâ jam vice differere cogor. Flagitii principium est nudare inter cives corpora, inquiebat *Ennius* apud *Ciceron.* lib. 4. quest. *Tuscul.* quod Romuli lege erat prohibitum; & nihil tām primum ad libidinem, quàm ea, quæ vel natura abscondit, vel disciplina velavit, membrorum opera retegere, deque iisdem confabulari. Sic apud Persas nudum inspicere hominem, grande erat nefas & morte piandum, quod teste *Herodoto* lib. 1. apud Lydos, aliquosque barbaros etiam erat in usu.

Verum, cum *Celsi* elogio sermonis pudorem & artis præcepta simul servare difficile non modo, sed plane impossibile sit, & naturâ duce nullum detur turpitudinis flagitium, condonent mihi animi scrupulosiores, quod vi-

2.

rōrum in arte medicā p̄æclarissimorum exempla secutus, stylo liberiori scapham scapham nominaverim. Hoc sanè non fit, ut lasciviae incitamenta sugererem, sed ut affectū maximē exosī indole erutā curationem concinnam exhiberem, memor illius, quod *Theodorus Priscianus* dicerre solebat, inter mysteria, quæ medici circa mulieres faciunt, omnium maximē necessarium & gloriosum esse, quod impendatur in conceptum; imò nihil magis medicos reddere divites, quam conceptum adjuvare.

Si verò quis p̄æter spem tām petulanti sit splene, ut ea, quæ de rebus generationi inservientibus dicta fuerunt, ad impudicas cogitationes & verba lasciva trahere tentet, ille nequitiae suæ luat pœnas. Mundis omnia munda. Animum qui affert impurum, non auferet infectum. Meas tuetur partes *D. Augustinus lib. 14. de civitate Dei. c 23.* quando dicit: Quisquis ad has literas impudicas accedit, culpam refugiat, non naturam; facta denotet suæ turpitudinis, non verba necessitatis, in quibus facile pudicus & religiosus lector ignoscet... quia non damnabilem obscenitatem commemoramus, sed in explicandis, quantum possumus, humanæ generationis affectibus, verba tamen obscena devitamus.

Censor itaque in ious dissertationis hujus cancellos non intret, aut si intraverit, exeat rursus, ne eidem accidat, quod *Catoni* olim, cum theatrum, in quo ludi Florales à nudatis mulieribus celebrabantur, evenisse legitur. Scilicet monitus fuit à Favonio, ut discederet.

Supremum ego Numen devotis veneror precibus, ut conatibus meis addere velit successus felicissimus!

**CAPUT**

## CAPUT I.

*a nominis explicazione exordium sumit.*

**D**E sterilitate pauca quædam commentaturi, ne in ignotâ, quod ajunt, sylvâ versantes sâpe impingamus, necesse est monita observare Xenophontis lib. 1. de institut. Cyri, dicentis: *ἀδὲν ἀτας Ἀτ' εὐχενσον, ἀπα καλὸν τοῖς ἀνθρώποις, ἡς οἱ Εἴξις*; Hujus dicterii memores, ut omnia ordine & methodô certâ ac eleganti pertractentur, nominis explicatio philologica erit præmittenda.

Δύο, ait Clemens Alexandrin. lib. 6. Strom. *ἴστον ιδίαγ αληθίας, τὰ τε ὄνοματα καὶ πράγματα*. Nomina quippe rerum existunt cubilia, ut in nativâ facie vix melius conspici valeant, quam per hæc involucra. Unde & Philosoph. i. poster. analyt. cap. i. *πεώπτες ἐξετάζειν τὰ ὄνοματα* jubet, quia ex his, juxta laudatum Autorem *πεօύπαρχόσαις γνώσεσι*, cuiusque rei facilior & expeditior tractatio. Hoc autem felicius in effectum traducere vix poterimus, nisi viâ, hactenùs in scholis medicorum tritâ incedentes evolutionem hanc nominalem **ETYMOLOGIA, HOMONYMIA & SYNONYMIA** absolvamus.

ETYMOLOGIAM quod concernit sterilitas dicitur à *sterilis*, *e*, quæ vox origine græca, temporis successu in Latium fuit introducta. Derivatur à nomine *στεῖρος*, quod est ex *στέρεω*, privo, orbo; unde & *στεῖρος privatio*, vid. Martin. lexic. etym. Non nulli derivatione hâc non contenti, aliam in proscenium protrahunt deducendo sterilitatem à barbaro vocabulo *steria*, quod ute- rum seu matricem designat; quo de Ger. Job. Vossius l. 2. de vitiis sermon. latin. cap. 50. p. m. 633.

HOMONYMIÆ ratio etiam habenda, quæ, nisi probè excutiatur, fœcunda variorum errorum genitrix existere solet. Insignis enim apud Autores hujus nominis occurrit latitudo. 1. *In genere* quamcunque denotat infœcunditatem sive infructuositatem, & animantibus æque adcommmodatur, ac inanimatis; quô in signifi-

ficatu apud Plinium, agri & montes; apud Curtium terræ & arenæ steriles dicuntur. Apud Columellam legitur annonæ sterilitas. Tacitus l. 1. Histor. c. 30. seculum virtutibus sterile nominat, in quo virtutes suppressæ & carceribus quasi inclusæ detinentur, & l. c. c. 90. donum usū sterile, quō nullam conciliamus gratiam. Ita Plautus Trucul. 2. 1. 30. sterilem à datis vocat avarum. *Jctis* pecuniae steriles sunt, quæ nullam pariunt usuram l. 7. ff. de usur. (2.) Speciatim malum utriusque sexui commune complectitur, de quo Arist. l. 2. de gen. animal. c. 8. Mercat. l. 3. de affect. mulier. c. 2. River. l. 15. prax. med. c. 15. aliig. (3.) Specialissimè mulieribus solummodo imponitur, utpote quarum proprium est parere; hōc si orbantur, nullumque edunt fœcunditatis indicium, jure optimo steriles salutantur; quā significatione etiam hāc vice venit, & pro causarum diversitate aliam distinctionem admittens sumitur vel absolute, vel respectivē.

Absolutè steriles dicuntur, quæ ad concipiendum pariendūmve planè sunt ineptæ, sive hoc fiat à vitio congenito; sive à dispositione morbosā. vid Hippocrat. l. de nat. mul. & l. de steril. Respectu vè verò, quando ad tempus saltem steriles sunt, respectu scilicet hujus vel illius mari- ti. vid. Mercat. l. c. Mercuriali. de morb. mulier. lib. 11. c. 2. Sic Livia ex Tiberio Nerone liberos suscepit, Tiberium videlicet & Drusum; Cæsari verò Augusto, etsi maximopere ab eodem adamaretur, nullam edidit sobolem teste Tacito l. 5. annal. c. 1.

Tandem SYNONYMIA, quæ variorum nominum appositiōne rei illustrat evidentiam, examinanda. Græco idiomate dicitur στεγνοῖς & στεγωσῖς, Mercuriali & Primerosio scribere placet στέγωσις. Galenus vocat ἀποκίας, unde apud eundem & Plinium ἀποκονος medicamentum est sterilitatem inducens. Plutarcho ἀγονία & ἀπεκ- νία, Hippocrati ἀφορία & ἀγεννησία audit. Apud Romanos eminet sterilitas, infæcunditas, vanus concubitus, conceptionis lesio, & quæ sunt aliæ circumscriptiones, quibus leporem & modestiam æstimant Autores. Imprægnationis difficultas etiam dicitur, quamvis Guainerius de ægrit. matric. & Forestus l. 28. observ. 58. sterilitati contradistingvant. Si verò fascino malum originem debet, ligatum; fæminæ cō correptæ, ligatæ nuncupantur, autore del Rio disquisit.

disquisit. magic. l. 3. p. 2. s. 7. Hebrei utuntur vocula רָקַע à radice רַקֵּעַ extirpavit, enervavit; Germani die Unfruchtbarkeit.

## CAPUT II.

### definitionem exhibet realem.

Præmissis iis, quæ ad nominis evolutionem faciunt, rei ipsius essentia, quò melius innotescat, opus est, ut disertissimi Romani Oratoris, & ex nostræ artis primiceriis, Pergameni præcepta attendamus. Ille lib. 1. de offic. omnis, ait, quæ de re quadam suscipitur disceptatio, ab eo, quid res sit, sumit exordium: hic verò in definit. med. ὁράτῳ λόγῳ τὸ εἶναι δεῖλῶν, definitio est oratio, rei essentiam quæ declarat; inde sequentem damus definitionem:

*Sterilitas est mulieris, justo etatis vigore constituta, & viri benè sese habentis consuetudine utentis impotentia ad concipiendum, proveniens à lascione uteri archeo.*

Definitionem hanc utpote essentialibus suis partibus constantem exactè affectui nostro competere, cuilibet ipsam intuenti facile patescit. Generis loco ponitur *impotentia*. Hæc uti essentiam sterilitatis in genere determinat, ita etiam sterilitatis muliebris rationem formalem complectitur.

Quamlibet enim conceptionem præcedere debet *i. carnalis utriusq; sexus, virilis eque ac muliebris, copula*, sine quâ impossibile est, fœminam concipere foetumque eniti. Naturæ legibus id contrariari, ratio evincit & experientia. Cum quæso, ea, quæ in superfluis nunquam abundat, diversum produxisset sexum, si fœmina sola humanam servare posset posteritatem? nonne sexus nobilior esset frustraneus?

Fabulosa proinde est narratio Pompon. Melæ l. 3. cap. 3. de insulâ, mulieres absque virorum compressione concipientes suaquæ sponte fœcundas producente; & erronea Vallesi opinio, quando lib. 2. controvers. med. & philos. c. 7. evincere conatur, fœminam ex se solâ posse concipere, sed solummodo fœmellas, easque debillimas. Insignem quoque erravit errorem Parliamentum Gratianopolitanum,

num, dum filium *Magdalena d' Auvermont*, quarto post mariti absentiam anno, natum, legitimum paternorum bonorum hæredem publicâ sententiâ constituit; persuasum à medicis & obstetricibus, filium istum solâ imaginationis vi fuisse conceptum. Historiam cum Parliamentorum decretis prolixè describunt *Harsdörf. theatr. histor. amœn. p. 7. c. 2. Th. Barthol. histor. rario. cent. 6. histor. 61. Deusing. histor. fæt. extra uter. genit. sect. 2. §. 35.* Nostra sanè ætate vix invenies maritum tam credulum, ut tale quid ab uxore sibi persuaderi patiatur, etiamsi medici & obstetricis testimonia, imo ipsius judicis sententiam petat in subsidium. Neque minorem perpessus lapsus *Averrhoës*, cum ætatis floridæ fœminam ex balneo, cui semen infusum virile, concepisse affirmat; hoc certè, sicuti ex vetulæ cujusdam relatione habet, ita ceu anilem fabulam cum aliis ejusdem farinæ historiolis jure deridet *Sinibald. l. i. Geneanbr. tr. 3. cap. 7.*

Multo minus fœmina ex fœminâ fœcundari potest, quod quidem *Amat. Lusitan.* vir aliàs non ineptus, satis ineptè tamen asserit *curat. med. cent. 7. cur. 18.* de Turca quadam muliere, quæ cum marito, qui diuturnum meditatus iter, congressâ, nullâ interpositâ morâ vicinas adierit ædes, ibidemque aliam à se adamatam comprimens, imprægnaverit. Fœmina ista, dubio procul ex illarum fuit numero, quæ libidine detestanda utramque exercent Venerem & *τριβάδες* Græcis, Latinis *fricatrices* vocantur, nunquam tamen uterum imprægnant. De his scribit *Cælius Aurelianus lib. 4. tard. pass. c. 9.* lubentiùs cum fœminis, quām cum maribus misceri, mutuis congressibus tām incubis, quām succubis sese pollutibus. Exempla desideras? evolve *Leon. Afric. peregrinat. l. 3. Schenck. observ. lib. 4. Tulp. observ. med. l. 3. c. 35.*

2. *Præcedere etiam debet conceptionem copula efficax h. e.* ut materia conceptum constituens à muliere in actio-  
ne conjugali modo legitimo suppeditetur, quæ nihil aliud est, quām ovulum, mole suâ perexiguum, in quo, ut *Malpighius effert anat. plantar. p. m. 38.* cicatrix fœcundâ colliquamenti portione ambitur, quod in uterum delapsum, adveniente ab eodem succo nutritio in novum excrescit ovum, aducto sensim foetu. Hæc igitur ma-  
teria, quamvis primâ fronte levis, & nullius ferè ponderis appareat,

ad uteri fœcundationem tamen summè est necessaria, ut eā deficiente, aut illegitimè suppeditatā statim adsit impotentia ad concipiendum, nostræ jam quæ considerationis.

*Ad concipiendum addidimus in definitione, ut concipientes quidem, conceptum verò ante legitimum tempus rejicientes, hoc vitio, quo propriè non laborant, eximantur, quod contra Vallesium bene tenendum monet Paul. Zaccbias quest. med. legal. l. 3. t. 1. q. 7. n. 8. & contra Moschionem Primeros. libr. 4. de morb. mulier. cap. 1.*

Notanter etiam dictum fuit: *mulieris justo ætatis vigore constituta*; quo ipso indicatur, ad sacra matrimonii munia obeunda debitam postulari ætatem, variè à variis præscriptam Autoribus. Plurimi cum Aristotele commodissimum nubendi tempus judicant ab anno ætatis 14. usque ad 45. Illud, quod Montanus determinat, nec mulierculis, nec Sinibaldo arridet, causas vide apud citatum Autorem l. alleg. lib. 2. tr. 3. c. 4. Optima enim proles provenit, cù dñuñ, cum vigent parentes, inquit Philosoph. l. 5. hist. animal. c. 14. Hi verò non semper, sed solùm in ætate juvenili & consistente vigent, virent, florent. Plenis nubiles annis Herus & Leander feliciter lætis indulgent amoribus; extincto verò lucernæ lumine, calore quippe naturali deficiente, juvenilis quoque concupiscentiæ ardor extinguitur, & gelidâ senectutis procellâ exagitati aquis immerguntur tandemque planè suffocantur, sonant verba Roflincii, τὰ μαναεῖταις, ord. & metb. cognosc. part. genit. per anat. part. l. cap. 1. Hinc puellas & vetulas, quibus sterilitatis nota neutiquam inurenda, hic excludimus, quamvis nec virum pati, nec sobolem eniti valeant, quia id, naturâ sic jubente, ipsis accidit.

In puellis enim, humor alimentaris sive lympha balsamica, οόσις Δεis blandis particulis fœta, ex qua aliàs liquor seminalis fœcundus in ovulis ovario contentis elaboratur, in augmentum abit, attestante maximo, uti à Seneca appellatur, Medicorum & hujus scientiæ conditore l. aphor. 14. Cui nec ipse Philosophus refragatur lib. 1. de gener. animal. cap. 18. Insuper, (ut iterum verba B. Roflincii mea faciam) acerba res est, & immitis uva virgo ante tempus decerpta, quæ, ut canit Horatius:

Non-

*Nondum subacta ferre potest jugum  
cervice,  
& eam ante contestatam sanguine maturitatem, viro qui tradit, injuriam facit naturæ.*

Cæterum, quod Olearius *Itiner. Persic. lib. 2. cap. 12.* de Russicarum & Finlandicarum foemellarum undecennium matrimonio tradit, & Savonarol. *tr. 6. pract. maj. rubr. 6.* de puella, quæ nonô ætatis anno peperit; Kotzack *tr. med. de sal. cap. 8. sect. 12.* de octenni à juvēne novenni imprægnata; *Crus. annal. Svev. p. 3. l. 4. cap. 11.* Schenck. *l. 4. observ. 125.* & Th. Barthol. *histor. rar. cent. 5. histor. 17.* de aliis octennibus, novennibus & undecennibus puerperis referunt, ipsis ut Autoribus fide dignis credimus, sed qualesnam ex tām præcoci puerperio prodierint liberi, quidque parentibus consenscentibus evenerit, adnotatum non videmus. Immaturam hanc ætatem immaturos produxisse fructus affirmare quid prohibet? Evolvi merentur, quæ de tām immaturo conjugio *Conringius, in cineribus nunquam sine honoris titulo nominandus,* disquirit *lib. de habit. German. caus. p. 41.* Fidem superare videntur, quæ *Plinius l. 7. histor. nat. cap. 2.* & *Solin. collect. rer. memorab. cap. 65.* de foeminis quibusdam Indis quintō ætatis anno foecundis, sed vitam raro ultra octavum protrahentibus, item *Mandelslo Itin. Orient. cap. 39. l. 1. p. 106.* de puellâ, sex annos natâ, filium enixâ commemorant.

Vetulas, quæ ab Apulejo *l. 4.* busto dignæ, vitæ dedecus & orci dicuntur fastidium, quod attinet, eas ad opus hocce naturalissimum planè ineptas existere, prolixâ non indiget probatione. Natura enim ob caloris debilitatem in illis tām operosa non est, ut succum alienabilem cogat in liquorem seminalem, cum pro generatione amplius eodem opus non habeat. Exempla à *Valesc. de Taranta l. 6. philon. pharmac. c. 9.* & *Schenck. l. c. observ. 132. 133.* literis mandata, & à *Sperling. de format. fæt. in uter. c. 3. q. 3.* repetita, quoniam ex rarioribus, tantam non merentur attentionem, multo minus novum in physiologia constituunt canonem.

Ex allatis itaque nunc suâ radiat luce, ætatem habilem jure merito desiderari ad conceptionem, quamvis ob diversam diversorum individuorum constitutionem, aliasque causas fortè externas, modò citius sece exerat, modò diutius perduret.

*Viri benè sese habentis consuetudine utentis: pergitus, ut mulieres, viro impotenti seu frigido junctas, ab hoc vitio, ceu innocentes, absolvamus. Fœminam solam absque virili compressione concipere non posse, liquet ex predictis. Si igitur ob maris, quod sœpe fieri consuevit, impotentiam sufflaminatur conceptio, sanè fœmella in sterilium censem neutquam collocanda, nec, qui hinc subsequitur, imprægnationis defectus, atro infœcunditatis carbone signandus.*

Ad quamnam rerum p. n. classem referendus sit affectus, inventu haud est difficile: siquidem quia διάθεσις παρὰ Φύσιν, accidens scilicet, neque morborum, neque causarum generi adsociari commodè potest, ad symptomata facultatis læsæ, in specie naturalis abolitæ, adcommodatur. Sunt, qui cum *B. Mæbio l. 2. epitom. instit. med. p. 2. c. 13.* ad symptomata facultatis genitricis referunt; nobis tamen minimè contrariantur. Spiritum quippe genitale pro diverso à vitali ac animali agnoscentes, peculiarem facultatem, genitricem videlicet, eidem adsignant, sicque sterilitati inter symptomata facultatis genitricis locum tribuunt.

### CAP. III.

## *subjectum ventilat.*

**O**Stensâ morbi sede, curationes facilius in notitiam venire, non solum omni tempore probè attendunt Medicorum præclarissimi, sed & illius indagandæ necessitatem anxiè inculcat *Galenus 2. de loc. affect.* ἵνα εἰδωμένη τὴν μερίων χειρὶ περοφέγειν τὴν Φονήματα, ut scilicet sciamus, cui parti medicamenta sint applicanda. Horum vestigia prementes, subjectum affectus paulo dilucidius ut explicemus, ordinis expostulat ratio.

Illud in genere constituitur duplex, aliud ut *Quod*, aliud ut *Quo.* *Subjectum ut Quod*, cui radicaliter & ultimè inhæret adjunctum, est tota sexus sequioris fabrica microcosmica, anima constans rationali & corpore animali; de hac affirmatur, quod laboret sterilitate. Mas enim autore Aristotele *lib. 1. de gener. animal. cap. 2.* est τὸ εἰς ἄλλο γεννῶν ζῷον, animal generans in alio,

alio, fœmina verò τὸ ἐις ἔων τὸ καὶ ἐξ τὸ γίνεται ὑπάρχων τὸ τοῦ γεννητοῦ τὸ γενόμενον, id quod in se ipso & ex quo fit, quod generatur, contentum in eo, quod generat. Hinc exclusō à conceptione & partu mare, ille hoc modo sterilis dici non potest. De mulierum sterilitate solā hāc vice disquisitionem institui, ex suprà dictis cuilibet erit cognitum atque perspectum.

SUBJECTUM ut Quo, hoc est, quō mediante subjectum *Quod* aliquid recipit, est corpus fœmininum organicum ejusque partes.

PARTEM AFFECTAM PRIMARIAM seu subjectum principale absolvunt *partes* generationi primariò inservientes, quas duplices deprehendimus, alias fœcundationi, alias conceptioni dicatas. Iste sunt ovaria cum ovulis & tubæ Fallopianæ; hæ uterus.

*Ovaria*, quorum usum & strūcturæ accuratioris notitiam, *Hornii*, *Stenonis*, *Kerckringii*, *Graæfi*, *Swammerdamii*, *Bartholini Jun.* aliorumque industriæ debemus, si improbam in generandis ovulis navant operam, ut virus seminale debito modo non recipiant, obicem ponunt fœcundationi, sicque affectus subjecti principalis culpam subeunt.

*Tubæ Fallopianæ* à *Vesalio lib. 5. fabric. corpor. hum. c. 15.* sub vasorum deferentium schemate depictæ, quando ob pravam conformatiōnem contagio seminali, à mare utero communicato, aditum ad ovaria aut præcludunt, aut dato accessu, imprægnato ovulo transitum denegant, aut factâ compressione, illud frangunt. Simile infortunium ab eotundem intemperatâ dispositione metuendum esse, sedula cadaverum sectio testatur.

*Uterus* sicuti à provida matre natura, humanæ generationi ad speciei conservationem unicè est destinatus, ut citra convenientem illius adparatum frustra expectaveris conceptum, consentiente *Harveo de concept.* ita, cum contrariorum idem subjectum, læsæ hujus actionis pars affecta principalis jure etiam inculpari potest in quibusdam.

*Soli enim utero datam esse concipiendi provinciam*, neque ullibi extra eundem conceptum fuisse repertum, omnes ferè prisci ævi scriptores unanimi testantur suffragio: nostro tamen seculo,

quo

quò excusso autoritatis majorum jugo, plurima anthropologiæ mysteria, non tām mentis oculorumq; quām cultri anatomici acie, revelari consverunt, hāc de re à quibusdam non infimæ notæ medicis dubitari cœpit, utpote qui experientiā, quæ *Menandri* elogio inexperientiæ meritō imperat, firmati, existimant conceptionem, etiam, raro licet, extra uteri confinia fieri posse.

Dubitacioni huic primus ansam dedit *celeberrimus Parisiensium Prosector, Riolanus*, vit aliàs, Bartholini effato, tardæ fidei, dum in animadv. ad *Vesling*. scribit, multiplici constare experientiā fœtum extra uterum in tubis conceptum fuisse; idque lib.2. *Anthropol.* cap.34. trium exemplorum recensione comprobat.

Quod ipsum ut veritati conforme, quoque adstruit *Harveus*, & exerc. 63. de gener. animal. simile quid à se observatum narrando ad suas pertrahit partes Hornium & Deusingium. Ejusdem argumenti historiam habet *Vassilius*, Chirurgus Parisiensis, aëlis philosoph. societ. Reg. Anglic. an 1669. mens. Jun p.m. 814. intertextam, quam Nobiliss. Elsboltius epistolâ eleganti ad D. Wolrathum Huxholtium *Ephem. German.* dec.1. an. 4. & 5. adnexâ, illustravit. Hūc quoque trahere simulque inserere liceat, quod in analectis suis habet Exc. D.D. Praeses, Praeceptor, Hospes ac Studiorum Promotor debitā animi reverentia ad urnam usque suspiciendus, qui in nobilissimā conjugi, post minūs feliciter enixum fœtus sinistrum bracchium quæ exspiravit, altero die in apertâ abdominis cavitate fœtum intestinis quasi instratum deprehendit, & exploratione decenti instituta, rupturam uteri in sinistrō latere proximè ad os internum deprehendit, uteriisque reliquam substantiam albam, duos digitos crassam, capitis magnitudinem æquantem, certissimo arguento, fœtum ad fines uteri coactum hæsisse circa os internum, moleque suā extendisse illam uteri partem, ita, ut, dum exitum quæsivit, prægresso maximō parturientis dolore planè disrupterit illam, & in abdominis cavitatem cesserit. Moles crassi istius uteri pendebat libras civiles sex & quadram. Hæc tamen obiter.

Augere dubitationem videtur nota apud *Salmuth*. cent. 3. obseru. 94. historia, de juvenculâ ex nefando congressu fœtum per os enitente; ut & fœtus *Mussipontanus* extra uterum, in media abdo-

*minis cavitate conceptus*, ibique post matris obitum repertus, quod de *Straussius tract.* peculiari videri meretur. Addi potest, quod *Th. Bartholinus* variis in locis suorum scriptorum tradidit de fele in arce Fridericiburgensi, summâ cum adstantium & spectantium admiratione ac stupore, foetus suos per os eructante; & *Rommelius discurs. physico-med.* de foetibus leporinis extra uterum repertis. Accedit ulterius *Wieri*, *Zac. Lusitani*, *Plateri*, *Plempii &c.* autoritas, quâ proditur, mulieres nonnullas, quibus corruptus uterus fuerit abscissus, non solum superstites mansisse, sed & liberos procreasse. Imò subsidium petere posset dubitatio ex historia à *B. Rofincio l.c.p. 2. c. 45.* de Romana muliere notata, nisi *Cesalpini* censura fuisset adnexa.

*Verum enim verò hæc & similia omnia Diemerbræck. l. 1. a-*  
*nat. c. 23.* tanquam nugas & fabulas ex anili depromtas colo rejicit; quo verò jure ostendit *Swammerdam de uter. muliebr. fabr. p. 26.* In quibusdam calculum ipsi promte adjicimus, non autem in omnibus. Nam quæ de conceptione tubariâ diximus, extraordinaria quidem sunt exempla & rarissima, rationi tamen & experientiæ non contraria, neque ex anili depromta colo, siquidem naturæ ordinis nihil derogant; multo minus ordinarias in Physica regulas evertunt.

Uterum igitur solum foetus conceptioni, formationi & gestationi aptum præbere domicilium, præter jam dicta sole meridiano clarius dispalescit ex elegantissimâ ac stupendâ propemodum illius structurâ, quam ex anatomieis & physiologicis latius hic repeteremus non est, id solummodo notasse sufficiat, quod uti conceptionis locus ordinarius, ita quoque præter legitimam conformatiōnēm justa quoque dispositio & maturitas quasi requiratur, sine quâ nullus congressum subsequitur conceptus.

Maturitatis indicium stata præbet ætas. In quonam autem illa consistat, & unde dependeat, difficilis sanè est determinationis. Fermenti uterini energiæ, cui cum *Helmontio* & *Willisio* plurimi patrocinantur, plurimum hic tribuendum, refragante licet *Peyero & Hardero prodr. physiol. c. 9.* Archeus enim toti & cuilibet parti prospiciens, auctis & concitatis partibus in massa sanguinea, balsamicis, volatilibus, *Æcis* & salinis, aquæ nimiâ, quâ antea irre-

irretiebantur humiditate, liberis oribus factis, fermentum hoc, à p̄t̄mō formationis tempore, in utero latitans, suscitat atque exaltat, cuius postmodum ope ὁργασμὸν sive turgescientiam ciet in sanguine, quò, auctâ hujus mole, pars superflua, reseratis vasculorum utero & vaginæ implantatorum osculis, statim tempore excidat atque evacuetur, néque tamen supra mensuræ ordinariæ pondus, donec, urgente necessitate, fœtui generando impendere possit. Hinc calor vegetus existit, vox sonora, vires robustæ evadunt, mammæ fororiari, pilosæ progenies in pudendis erumpere incipiunt, ac fœminæ ad conceptum aptæ fiunt, *confirmante ipso Arist. l. 7. hist. anim. c. i.* sicquæ dicta dispositio & maturitas exoritur. Hanc etiam fabricat idem archeus, ovula fœcundo liquore seminali turgida in ovario elaborando, quæ ceu fructus maturus effluvia quædam Θinodæa de se spargunt, & partim sanguini, partim nervoso generi communicata, peculiares in corpore dant motus, spiritus sopitos excitant, qui ad organa generationi dicata, imprimis uterum, rūentes, Veneris appetentiam accidunt, prurientesque in libidinem raptus commovent, teste *Clar. Peyero epist. lib. cit. inserta.* Causas præterea externas quasdam, præcipue spirituum proventum largiore promittentes, vel eosdem torpidos excitandi & ad partes genitales propellendi vi pollentes, multum huc conferre nemo fortean erit, qui dubitet; ex quibus juxta *Harveum de concept. p. m. 294.* præ cæteris nominanda familiaris foemellarum cum maribus conversatio, accendentibus, quas plerumque fieri amant, blandâ de aphrodisiis confabulatione, mutuâ osculorum impressione, aliisque amoris lascivientis illecebris: causas concinnè explicat *Willis cap. 22. nerv. descript. & usu p. m. 115.*

Hinc utero eō, quō hactenū exposuitus modo, constitutō, cùm commodior conceptionis officina non detur, nec embryoni tūm efformando, tūm ad debitum usque tempus gerendo magis adcommodatus locus vix inveniatur in toto corpore muliebri, nullum restat dubium, quin ejusdem fabrica, primariam in plurimis individuis affectus nostri absolvat partem affectam, inqve ea omnis omnino residueat infœcunditatis culpa, nisi quis datâ operâ aliter stauerit. Pessundatâ qvippe laudabili hâc constitutione, si vitium,

vel proprio errore, vel aliunde communicatum contraxerit, tunc certè partim virile miasma suffocando locum præscriptum attingere non sinit, partim fœcundatum ex ovario per tubas devolutum o-vulum fovere & retinere nescit, donec archeus architectus, novum ex eo domicilium extruere intendens, necessaria in subsidium pe-tat ; turbatus verò in opere, corruptus, insensibilique abortu illud rejiciat : atque sic frustranea Veneris litatio & sterilitas in thoro exoriatur.

Subjectum *adæquatum* sive *causæ* sunt viscera primæ & secun-dæ coctioni destinata, hoc est, viscera chyli, sanguinis & lymphæ præparationi, elaborationi & depurationi destinata, ut ventricu-lus, pancreas, mesenterium, cor, hepar, lien, & omnes totius cor-poris glandulæ cum suis vasis, & quæ de earum natura participant, *verbo*, viscera omnia, quæ in sanguine generando, & lympha de-puranda, secernendâ & excernendâ malè locant operam, tūm in to-tō, tūm in parte.

## C A P U T IV.

### *causas proponit immediatam & mediatas proximiores.*

**D**ifficilem esse causarum doctrinam, & intricatam illarum inve-stigationem, nemò fortean negabit, nisi mente captus & aver-sus à vero ; imò quorundam affectuum causam immediatam & pro-ximam planè erui non posse, pluribus ostendere satagit *Excell. D.D. Amman. parænes. ad discent. lib. 2. p. 2. c. 1.* attamen cùm *Celso* mo-nitore *lib. 1. præfat.* ille solùm rectè curat, quem origo causæ non sefellerit, & *Tralliani* *judicio* ; ἀδύνατόν εἶναι τὴν θεραπείαν, τὴν αἵλια μὴ διεγνωκότας περιέχει τὴν νοσηποιὸν, impossibile cu-nationem invenire, nisi morbi effectrix causa priùs sit cognita ; o-pus utique erit, ut si morbi hujus abolitionem feliciter moliri vel-i-mus, causas ipsius, quantum quidem in re hâc arduâ pro ingenii mo-dulo fieri potest, probe evolvamus.

Has, quoniam multiplices & vel proximiùs vel remotiùs con-currunt,

currunt, ordine usitatō excutiēmus à PROXIMA ET IMMEDIATE initium sumentes, quam facimus archeum uteri lēsum, seu, quod prisci ævi dixerunt scriptores: facultatem uteri conceptricem frustram. Atque ita in genere sentiunt omnes ferè, tūm ex veterum, tum ex recentiorum scholis; in modo autem, quo conceptrix sive archeus frustretur, valde adhuc dissoni, cùm alium veteres propo- nant, alium recentiores.

Veneranda antiquitas, frustrationem istam in quatuor opera- tionibus, ad quācunque conceptionem legitimam necessariis, ra- dicare credidit, quarum (1.) ut mulier in congressu semen virile convenienter utero recipiat; (2.) ut receptum semen debito modo ac tempore retineat; (3.) ut illud foveat ac conservet; (4) ut ma- teriam ad fœtus formationem & incrementum conducibilem sub- ministret. Inde etiam quatuor ejusdem impedimenta ordinavit, si scilicet foemina genituram non recipiat, non retineat, non foveat, non nutriat.

Sed Anatome oculatior cùm aliud recentioribus, accuratâ & indefessâ investigatione naturæ arcana scruntibus, apertè mon- straverit ac detexerit, meritò, meliora hâc in parte edocti, veterum placita relinquimus; neotericorum verò opinionem amplectentes dicimus, archeum in arduo conceptionis humanæ negotio lædi vel à materiali heterogeneo uteri loculis inhærenti, dum nimirum spi- ritus fœundi à mare sub crassiori spermatis tegmine excreti con- tagium sufflaminat & impedit, quò minùs ad ovarium penetra- re, ibidem torpidum ovulorum spiritum excitare, seque cum eodem vitaliter fermentando unire queat; vel à vitiosa conforma- tione, organis in specie generationi dicatis inductâ, quâ conjun- ctio matrimonialis aut planè impeditur, aut ovum non fœcun- datur, aut fœundatum diu non subsistit, sed morâ & radicatione prohibitâ exitum affectat.

CAUSÆ MEDIATÆ PROXIMIORIS vices gerunt omnia ea, quæcun- que archeum lædere, ipsi in opere suo turbas & impedimenta stru- ere apta sunt. Illa ad duo potissimum genera reduci possunt, vel ad totum corpus, vel ad uterum.

A toto corpore vitium dependet, quando illud est aut nimis  
cacochy-

cacochymicum, aut nimis obesum. Sic apud scriptores medicos passim occurunt exempla mulierum cacochymicarum & obesarum per aliquot annos sterilium, quæ sublato morbo feliciter conceperunt; de quibus infra commodior differendi locus.

Ab utero & partibus genitalibus verò, quando illarum constitutio est p. n. quæ consideranda partim ratione sui, partim ratione mensium.

*Ratione sui* considerata res per se est clara. P. n. enim ista constitutio originem debet vel temperiei perversæ, vel conformati pravæ. Temperies perversa duplicem exhibet materiam peccantem, vaporosam videlicet seu potius flatuosam, & humorosam.

Vaporosam efficiunt flatus τῆς ἀρρώστιας τὸ θερμόν, caloris respectivè debilis & humoris aquei pernitosæ proles. Hos peregrinos in utero generari, & tædiosam moliri tensionem, etiam suo adnotavit ævo Hippocr. l. i. de morb. mulier. Eosdein, contradicente licet Helmontio l. de flatibus, accusat Bartholin. quando cent. 30. hist. 21. ait. observavi ex flatibus sæpè commotum uterum imposuisse mulieribus, quæ falso sibi persuaserant se uterum gestare. Exempla afferunt Dodoneus observat. medic. cap. 49. Marc. Donat. hist. med. minab. lib. 4. c. 25. Höchstett. decad. 6. cas. 4. & Zacut. Lusitan. præx. admirab. l. 2. obs. 151. meminit Baronissæ pro grida habitæ, quæ octavo mense infantis loco flatum magnô cum fragore utero extorsit, cum albæ pituitæ multâ colluvie; & aliis novembris, quæ partus dolore vexata, ex utero magnâ vi bombum emisit, ac si tonitruum exaudiretur. Paucis abhinc annis similes causas observavit Excell. Dn. D. Præses in sua praxi, semel in uxore quadam civis Jenensis, quæ, Lucinæ labores primâ vice expertura, præsente obstetricie, aliisque mulierculis auxiliatrices in puerperio manus ferentibus, ex utero ter flatum voce leviter sonorâ absque foetu subsequentे, emisit. Postea verò sterilis hydrope uterino fuit extincta. Deinde in nobili matrona cacochymica, quæ se concepisse gavisa ex signis alias consuetis, unde ad partum omnia debito tempore præparat, advocataque obstetricie & aliis amicis advolantibus, u-

teri dolores quasi jam paritura experitur, nullo tamen foetu prodeunte, nihilominus in XVIII. mensa manente turgidō & motum per intervalla sentiente ventre, quasi ingravidatus idem esset adhuc. Lactavit interea se maritus atque uxor spe, sed prorsus vanā! futuræ prolis, usque dum pharmacum propinatum nullitatem gravidationis ostenderit. Digerentibus & evacuantibus tunc adhibitis, ampla vermium progenies evacuata unā cum folliculis ovi gallinacei magnitudinem æquantibus, qui aéri expositi rumpebantur, verminosamque, qualem in caseis, ostendebant sobolem planè innumeram. Ita spe excidit suā optima illa matrona, prolem vehementissimè desiderans.

*Harveus etiam exercit. de partu p. m. 261.* novit juvenculam, cuiusdam Medici ipsi familiarissimi filiam, quæ grida facta, symptomata omnia prægnantes comitari solita experiebatur; ea sana & vegeta, post decimam quartam septimanam foetus in utero sensit motum; tempusque partui debitum emensa, indiciaque jam imminentis partus adesse rata, cubile, incunabula, cæteraque ad partum necessaria in promptu habuit. Sed omnia frustra; Lucina enim abnuit, consueti motus cessarunt, ac, ut increverat, detumuit venter, absque ullâ ægritudine, nisi quod infœcunda manserit. Idem novit aliam matronam nobilem, quæ plus decies enixa fuerat, quamque menstruorum suppressio citra imprægnationem nunquam fecellerat. Postea autem alteri nupta, præter alia signa solita ex motu quoque se gravidam judicabat, neque ab ea opinione dimoveri poterat: donec spes omnis in flatum & pinguedinem facellerat.

Flatus isti, *cum autore Kergero de ferment. f. 3. c. 3.* generentur ex vitiosa fermentatione prædominante acido p. n. in materia viscida calorem nativum obtundente, si ob turgescentiam expansi, impedito excursu liberò, impetuose per uteri pomoeria rapiuntur, in parietes impingunt, & molestâ suâ tensione archeum insigniter irritant, ut sperma masculinum, evanescente contagio spirituoso, retinere commodè nequeat, sed illud subito, interdum cum impetu, iterum rejiciat, sicque pernitiosam sobolis concipiendi abolitionem fabricet.

*Humorosam* absolvunt humores naturaliter hūc affluentes, quorum duos solummodo offendimus: sanguinem scilicet & serum seu potius lympham. Hi succi vitales, absq; prava qualitate sola *quantitate* raro peccare videntur, nisi in plethoricis, obesis & non menstruatis.

*Qualitate* autem delinquentes promptius suum conferunt symbolum. Partes enim excrementitiae, bilofæ, acidæ, pituitosæ, viscidæ, spissescentes, quando abundant in massa sanguinea, (obtusis blandis, balsamicis, oösis, ♀eis, volatilibus) nec per emunctoria solita ritè secernuntur, spirituum lumen obtenebrant ac depauperant, lymphaticamque cumulant fatuitatem. Hinc turbatâ ovulorum & ovariorum temperie laudabili, latitantes in ovulis ideæ, quibus non aliter ac semini vegetabili sua species, insculptæ, simul pereunt, ut postmodum, quamvis prolificò maris irrorentur imbre, è suis latebris evolvi & in actum produci nequeant.

Ad uteri verò litora per ροδμαπσυὸν devectæ, pituitosæ imprimis, viscidæ, salibus imbutæ peregrinis; vel domestico vitio ibidem per ουναθερισμὸν collectæ, poros & glandulas laxant, lymphamque in circulo suo turbant, quæ non amplius sub vitali archei imperio, peregrinam induens naturam stagnat, vappescit, cumulatur: unde resolutò matricis tonò & fermentò de statu naturali dejectò, impossibile est, ut archeus variis hisce perturbationum procellis agitatus genituram amicè excipiat, foveat, foresque ad ovulum matrum feliciter fœcundandum, expandat; quin potius illam diluat ac suffocet, aut si ovulum fortean imprægnatum advolvetur, radicatione denegatâ illud rejiciat atque exturbet.

*Deinde pravam organorum generationi dicatorum conformatiōnē ad hanc archei turbationē ac impeditiōnē facere, prolixiori non opus est demonstrationē.*

*Loca muliebria p.n. coalita & arcetè clausa.* Vitium hoc, *sive* dependeat à membrana, *vel* peculiarī crassa, *vel* ea, quæ hymen vocatur, & virginitatis signum creditur; *sive* à carunculis myrtiformibus, alis, labiisque inter se cohærentibus; *sive* à vulneribus, ulceribus, tumoribus; *sive* à totâ vaginâ ita coarctatâ, ut membrum admitti nequeat, ineptas ad sobolis procreationem efficere fœminas est manifestum, non obstantibus exemplis quibusdam raro contingentibus & à Riolan. lib.2.anthrop. cap.34. Moinichen observ. Bar-

*tbol. communicat. & Lyser. cultro anat. subnex. p. 202. P. de Sorbait  
Ephem. Germ. Ann. 3. observ. 272. de Blegny Zodiac. med. Gallic. ann. 1.  
mens. Novembr. observ. 6. consignatis.*

*V. gine brevitatem ob dolores insignes, quos mulieribus, non modo in complexu, sed & post eundem excitat, sterilitati ansam præbere, ex historiâ Hildani cent. 6. obs. 61. adductâ à Graafio tr. de viror. organ. p. m. 43. constabit. Idem præstare illius solutionem continui ab ulceribus, fistulis, rhagadibus & occlusionem à calculo, Forest. l. 28. obs. 52. Sennert. part. med. lib. 4. p. 1. seEt. 1. cap. 9. & 10. Sorbait medicin. pract. tr. 5. cap. 49. Bonet. anat. pract. 3. f. 34. obs. 6. testantur.*

*Clitoridis prominentia major, præcipuè talis, qualem describit Platerus tom. 3. oper. med. c. 3. p. 198. prohibere potest conceptionem, dum conjunctioni matrimoniali objicit impedimenta. Idem fecit excrescentia carneâ circa interius orificium adnata & extra collum pendens, illudque exactè claudens, ephem. German. dec. 1. ann. 2. observat. 208. & natta ex foeminæ pudendis prominens atque à Clariss. Dn. D. Schubarto Medico Bregensi, sectione feliciter extirpata, l. c. an. 6. & 7. obs. 19. Simile quid vid. apud Zacut. Lusitan. prax. admirab. l. 3. obs. 78. Huc quoque referuntur fungi circa uteri cervicem excrescentes, Tulp. l. 3. obs. med. cap. 33. & sarcomata totam vaginam occupantia, forasque propendentia, de quibus vid. Kerckring. spicileg. anatom. obs. 53. Bonet. l. c. f. 22. observ. 7.*

*Orificium internum in situ vitiosô, tortuosô aut perversô, magnitudine & hiatu vel deficiente, vel exuperante, prolixis accusat verbis Hippocrat. l. de nat. mulier. & l. de sterilib. & hunc qui sequuntur Valesc. de Tanint. l. 6. Philon. pharm. c. 16. Mercat. l. c. idem inculpat Arabs l. 3. fen. 21. tr. 1. c. 8. cum inquit: **وَسَا كَارِنْ فِي فَدَّةٍ شَرِي** **مَلِبْ كَالْفَضِيبِ يَمْتَعُ بِخُولِ الْذَّكَرِ وَالْمَنِيِّ أَوْ قَرْوَجِ** *Nonnunquam est in ore ejus (matricis) res dura vel constans, sicut virga quæ prohibet ingressum viri & spermatis, aut ulcus; quam versionem ex dissertissimo, Celeberrimi Frischmuthii Patroni ac Praeceptoris summè colendi, ore habeo. Cervix etiam interdum in causa est, si illegitimè confonata aut exulcerata, demonstrantibus idem abunde Hippocrat. Aricenn. aliisque.**

Nec uteri fundus abit immunis, vulneratus scilicet, aut exulceratus, cuius exemplum meminit *Harveus l. c. p. m. 275.* Item si parietibus aut nimis crassis, duris, scirrhosis circumdatus, notante *Hildano cent. i. observ. 65. & 66.* vel si rarus, tenuis, instar spongiæ mollis, quod *Gemma lib. i. cap. 6. cosmograph.* observavit, vel si loco naturali amotus, nimirum ob partus difficiles antegressos extensus. *Vasa & glandulae* liquores maternos stillantia sin obstructa, aut illorum pori & orificia mucore oblita, huc ifidem spectant.

Quid, si *uterus ipse* penitus deficiat, quod *Columbo de re anat. lib. 15.* videre contigit; aut totus cartilagineus, quod *Riolano l. c. & Dn. D. Gnæfel. Ephem. Germ. ann. 4. & 5. observ. 57.* aut monstrosè efformatus, quod *Schenck. l. 4. observ. 311.* aut tuberibus carneis refertus, quod *Peyer. pareg. anat. 6.* aut tumoribus obsitus, quod *Hildan. l. c. Carol. Pison. de morb. à serof. colluv. f. 2. p. 2. c. 7. & Hucher. l. 2. de steril. p. 211.* aut lapidibus gravatus, quod *Schenck. l. c. obs. 331. B. Mæbio, fund. physiol. c. 20.* aliisque observare licuit, sentiendum, per se patet.

Porrò accusari debet, vasorum spermaticorum obstructio & inde nata intumescentia; quam testatur *P. Barbett. libr. 4. anat. pract. cap. 2.* tubarum intertio & clausura à *Veslingio & Graafio* notata; ut & totalis harum defectus, quem haud ineptè celeberr. *Francisc. de la boe Sylvius prax. med. lib. 3. c. 3. §. 10.* ex eo suspicatur, quod fœminæ, omnibus modis sanæ, Venere gaudeant ac delectentur, fluxumque menstrualem ordinariè experiantur, nihilo minus tamen nunquam concipient, etiamsi utantur viri optimè constituti consuetudine. Magnitudo excedens, durities & callositas huc quoque pertinent. Vid. *Meeckren. obs. med. chirurg. p. 1. c. 52. Blegny l. c. mens. Januar. observ. 6.*

Neque *Ovaria* hic silentii sibi sunt involvenda. Hæc enim *φαροιγία* à natura condita, & ex molibus conflata vesiculis, ut ovoidum generationi promptius inserviret structura, quando carnosiori aut compactiori obvelantur velamento, accedente nonnunquam, quod in obesioribus admodum familiare, pinguedine exuperante, suâ spe defraudant mulierculas proliis cupidas; Item quando majorem in molam p. n. augmentata, hydatidibus & peregrino humo-

humore turgida conspicuntur, aut planè deficiunt. Exempla vide apud *Schenkium*, *Vesalium*, *Riolanum*, *Diemerbroeckium*, *Riverium*, *Bonetum*, *Columbum*, *Meeckren*, & alios.

*Ova* ipsa crassioribus cincta tunieis, fœcundam seminis prolifici impressionem respuunt, nec vitalem recipiunt characterem; putrescent potius ex mente *Garmanni* *dissert. de ovo human.* §. 38. in ovario, aut in uterum delata in molas degenerant carnosas, aut insensibili eliminantur abortu.

*Corpus* denique *glandosum* circa ovulum imprægnatum emergere solitum flaccescens, ut hoc à fibrillis liberare & ex claustris propellere nequeat, sterilitati vias pandere potest facillimas.

Explicatâ hactenus uteri constitutione p. n. *natione sui*, restat, ut illam paucis adhuc perpendamus *nitione mensum*. Hos ad generationem humanam summè esse necessarios, tam manifestum est in foro medicô & passim adnotatum, ut religioni mihi ducam, asserti adducere testimonia.

Fœminæ enim lunari hâc deplectione carentes, illamque (effato *Excell. Dn. D. Wedelii*, *Patroni*, *Præceptoris ac studiorum promotoris etatem devenerandi*, *Theorem. med. part. 2. sect. 5. theor. 20.*) nec ante coitum, nec in coitu experientes, nunquam ferè vivunt sanitatem inculpatam, quin ut plurimum laborant sterilitate, & optatō conceptionis fructu, quem flos ille purpureus alijs polliceri assolet, rarissimè perfruuntur. Et quanquam fluor iste muliebris, docente *Dn. D. Schræckio in schol. observ. 41. ann. 1. decur. 2. ephem. germ. addito*, ad conceptum nullatenus requiratur, solius utpote sanguinis evacuandi gratia institutus: neque exempla desint mulierum, quæ menstrualem evacuationem nec ante, nec in, nec post partum perpellæ, nihilominus tamen liberorum matres feliciter extiterunt, evolv. præter laudatam *observ. Guainer. de ægritud. matric. cap. 2. Brassavol. ad aphor. 36. s. 5. Rondelet. meth. cur. morb. c. 24. Trinacvell. l. 10. de arte cur. part. corp. human. affect. cap. 9. Hildan. cent. 5. obs. 41. Marc. Donat. l. 4. hist. med. adm. c. 23. Job. Rhod. cent. 3. obs. 54. Ephem. Germ. dec. 1. ann. 3. obs. 132. & ann. 6. & 7. obs. 64.* rarissimum tamen hoc est in homine, & non nisi in brutis naturale.

*Immodicus mensum effluxus*, quando continuò, aut longiore,

quam par est, tempore durat, infœcundum reddit conjugium, genituram eluendo, aut ovum, spiritu plasticô irradiatum, inundando: unde cum radices agere in utero non valet, per vias patentes & lubricas, partu frustratô, exitum statim affectat. Exemplorum ex autoribus adducendorum copiosâ serie chartam prolongare, esset Athenas portare noctuas.

*De mensibus qualitate peccantibus*, quid statuendum, ex antea allatis elucescit. Venenosa illorum qualitas, quam veterum pluri-  
mi, & ex recentioribus nonnulli, firmiter sibi persuasam habent,  
non est metuenda. Vid. Sennert. l.c. cap. 1. quest. 2. Exc. D. D. Wedel. physiol. med. f. 3. c. 19.

Cæterum huc spectant, quæ de generatione elegantissime Huart. scrutin. ingen. c. 18. & 20. declarat, quæ foemina c. quo viro con-  
jungi per nuptias debeat, ut ex eo concipere possit. Hæc sanè observasse plurimum refert. Nisi enim justa harmonia spirituum & conveniens  
proportio inter agens & patiens, virum & foeminam adsit, & nisi teste Hippocr. de nat. homin. calidum cum frigido, siccum cum humido,  
moderate & æqualiter inter se respondeant, sed alterum altero, & va-  
lentiū imbecilliore longè excellat, nulla generatio futura est. Unde plurima exempla, Arist. 2. de gener. anim. assertum: multis sanè mul-  
eribus & viris evenit, ut qui conjuncti inter se procreare nequeant;  
ubi dissociati se junxere cum aliis, queant, toto die comprobant.  
vid. Huart. l. c. Pratis de arcend. steril. p. 122. Fortun. Fidel. de  
relat. medic. l. 3. c. 7.

## CAPUT V.

### *causas mediatas remotiores, super- naturales & naturales re- cenſet.*

IN SUPERNATURALI determinandâ jure merito DEUM, ut supre-  
mum conjugii autorem, agnoscere debemus; eidem sobolis ge-  
nerationem numerosam, ceu singulare donum, adscribendum esse,  
ſacrae

sacræ dictitant paginæ, *Psalm. 127. v. 3.* Per inscrutabilem enim suam sapientiam in tenebris prima vitæ nostræ ponit primordia, illiusque benedictione omnia fiunt, generantur & nascuntur quām felicissimè.

Ita *Sara* filium suum ex promissione divinâ concepit *Genes. 18. v. 10.* *Rebecca* diū sterilis, intercedente marito apud Dominum precibus, genuit *Eslavum* & *Jacobum*, *Gen. 28.* & *Hanna*, Elkanæ uxor, Samuelem, ac *Elisabetha* annosa Johannem suscepit assidiis suspiriis. Deo itaque propitiō uxor est sicut vitis fructifera, & filii ut plantæ circa mensam: iratō verò, uteri sunt steriles & ubera flaccida, quæ cominatur apud *Hoseam c. 9.* præter institutum concubitu se contaminantibus, aut alio scelere sese pollutibus; Quod exemplo *A-bimelechi*, *Gen. 20. v. 18.* *Michal 2.* *Samuel. 6. v. 23.* aliorumque patet.

Haud rarò ex permissione divinâ beneficia, Dæmonum, malè feriatorumque hominum ope producta, sterilitatem inducere valent. Testimonia ac exempla suggerit *del Rio disquisit. magic. libr. 3. p. 1. quest. 5. f. 8.* & *Bodinus* ultra 50. numerat modos ligandi tam foeminas, quām viros *de mag. Dæm. l. 2. cap. 1.* ex quibus non ultimum tenet locum, odium inter conjuges excitatum, cuius notatu dignum reperies exemplum apud *Codronch. l. 3. de morb. venef. c. 6.* in uxore quadam oppidi Sepini, Neapolitanæ ditioni subjecti, quæ maritum tantō prosequebatur odio per sagas excitatō, ut à primō matrimonii die nunquam cohabitare potuerit, & cum maritus ad uxorem accedere volebat, hæc tantō furore, tantāque rabie erat percita, ut per fenestras se præcipitem dare mallet, quām illius consortium admittere.

Inter CAUSAS NATURALES excellit temperamentum humidum & frigidum, disponens ut plurimūm foeminas ad infœcunditatem; quod vel exinde patescit, quia statum caloris nativi justō minorem manifestat, qui, dum particulæ oleofæ volatiles Ææ, sub serosarum sunt dominio, adeoque hæ excedentes illas superant; item dum lympha mitis à blandâ suâ remittit dulcedine, atque adulterâ factâ salinis, acidis, viscidis contaminatur atomis, non solum in toto corpore sese exerit, sed etiam circa uteri confinia erroris sui vestigia relinquens forces affectui facile aperire potest.

*Habitus corporis* in nimiam excrescens molem sterilitati obnoxias reddit mulieres. Indicat hoc ipsum *Aetius tetr. 4. f. 4. cap. 26.* adserens: *hoc veluti maximum negligendum non est.* Nec viri, nec mulieres pinguem acquirant habitum. Tales enim inepti sunt ad pueros gignendos; nam nec pudenda inter se coaptare possunt, & viri parum semenis emittunt, & mulieribus pauci feruntur menses, cum maxima pars alimenti transeat in pinguedinem. Magis perspicui sunt *Hæfer. in Hercul. med. l.7. c.1.* & *Sebitz. l.5. de aliment. fact. q.7.* quando liquoris seminalis & pinguedinis eandem esse materiam docent, quam lymphæ partes roscidæ, oöfæ, balsamicæ volatiles absolvunt. Hæ partes si ex sententiâ *Nebem. Grevv.* quam *discurs. de mixtion. s.5. exempl. 2. Ann. 9.* & *10. Ephem. German. adnexo* proponit, vel ab atomis propriis salinis seu acidis, vel à nitrosis aëris particulis cum iisdem mixtis, coagantur, & per ductus adiposos, à *Malpigh. epist. anat. de oment.* & *pingued. descriptos*, ad receptacula convenientia seu sacculos amandentur, certè aliter fieri non potest, quin corpus obesitate exuperante nimiam in molem, augeatur, spiritus langueant, illorumque lumen hōc in opere obfuscetur; partium præterea generationi destinatarum, pori & meatus comprimantur, ut aura seminalis, à mare suppeditata, ritè sese explicare, desideratumque portum appellere vix queat. Id quod *Cous plurimis in locis sæpius jam adductis etiam innuit.*

De macilenta corporis dispositione, quam modo citat. *Senex l. de steril.* itidem facit suspectam, certa quædam determinare non audemus, obstantibus exemplis ac rationibus in contrarium abeuntibus.

Ætatem summè teneram & extremè senilem hic excludi debere, *cap. 2. indicavimus*; juvenilem verò & consistentem, infœcundam esse constat. Ex hōc enim tempore plerumque hoc vexantur incommodō, quando nempè, ut cum *B. Mæbio* loquamur, spiritus genitalis sese exerere incipit, & quando ad concipiendum pariendumq; habili; est sequior sexus.

## CAPUT VI.

*causas non-naturales examinat.*

**N**aturales causas excipiunt NON-NATURALES, quæ ad producendam infœcunditatem admodum idoneæ; inter quas primùm se sifit

AER, cuius in alterandis corporibus maxima vis, adeò, ut *Hippocr. l. de flat.* morbos vix aliundè, quām ab eodem oriri, affirmare non dubitaverit. Hic enim frigore excedens & humiditate, excessus sui notam visceribus ac organis generationi inservientibus, non modò imprimit, sed & M. S. humoribus vitiosis replet & spiritus consopiendo archeum ita ignavum reddit, ut præter alios errores etiam ova cudat inutili abundantia serositate, ad fœcundationem minimè idonea. *Aer nebulosus, crassus, impurus,* non parùm confert; item *venti australes*, qui peculiari & specificō miasmate sexui sequiori maximè infenso, archeum vitæ præsidem, in varias perturbationum procellas agitare, & epidemias excitare possunt infœcunditates teste *Philos. 7. polit. cap. 16.* quales etiam referente *Clem. Alexandr. Strom. lib. 6.* observavit Empedocles in Agri-gentinorum fœminis, quas, venti aditu præcluso, iterum fœcundas effecit.

Regioni hoc in passu quid tribuendum docet iterum *Hippocr. l. de loc. aer. & aq.* in gente Scythicâ, quæ ob cœli inclem tam maximè infœcunda, & ad gratissimas voluptatis illecebras admodum deses, modò planè contrariò præ incolis, meridionales regiones inhabitantibus. De his enim rerum Indicarum scriptores produnt, quod ob loci caliditatem vehementissimâ Veneris appetentiâ aestuent, adeò, ut rarissimè duodecimum ætatis annum expectent fœmellæ, priusquam maribus corporis sui potestatem faciant. Hinc, quod *Herodotus l. 2. de Ægyptiorum mulieribus*, tam efferatâ libidine diffluentibus, ut se non temperent à coitu cum brutis, olim retulit, id *Garzias ab Horto lib. 1. arom. & simpl. medicam. apud Ind. nascent. s. 24. Costa l. arom. p. m. 288. Mandelslo Itiner. Ind. l. 2. c. 7. de In-*

dorum fœminis hodiè affirmant, præsertim de Lusitanis in Goâ, civitate opulentissimâ, degentibus. Harum siquidem mens struendis insidiis venereis, & continuandis amoribus illicitis adeo dedita, ut nullâ metus, nullâ reverentiæ lege coercibilis sit. Quandoquidem technas suas herbæ cujusdam adminiculo, quæ Dutroa seu Datura vocatur & à Th. Barthol. cent. 6. b. ist. 77. & à Fabro strychnom, p. 30. solani speciebus adnumeratur, perficiunt, dum, ut securè processos in nefandæ Veneris palæstram evocare, maritisque etiam presentibus imponere possint, succum ex recenti plantâ & semine expressum, vel siccata semina in pulverem redacta cum condimentis, cibô & potu, illis ignaris, propinant. Quibus assumatis varia experiuntur boni viri, Corneliorum familiæ jamjam adscribendi, vel enim somno corripiuntur profundo, vel mentis incurunt alienationem, ut apertis oculis, nequitiam & turpitudinem insipientes propriam se ipsos deludant, durante ejusmodi perturbatione ad XXIV. horas. Hæc dum geruntur, impudicæ adulteris suis impunè sese offerunt, & prostitutâ geniali thorâ omnem explent libidinem, donec ubi Veneri impuræ satis indultum, pedum lotione, vel fortiori frictione, vir omnium rerum, etiam modo visarum nescius, quasi ex somno meridiano iterum expurgiscitur.

*Astrologi* singulares siderum configurationes & aspectus producunt, ex quibus sterilitatem derivant, nempe ♀ læsam à ♂, impensis si ☽ simul lædatur & ♀ eam non adspiciat, vid. de his *Origan. t. I. part. 3. c. 3.*

Post aërem nominanda inter causas non naturales venit IN ORDINATA VICTUS RATIO, cum cibus & potus non ad tollendam, sed irritandam famem & sitim adsumuntur. *Ratione cibi* excessus committitur, quando ille ingeritur in quantitate nimia. Multos morbos multa fecerunt fercula, inquebat *Seneca epist. 95.* neque id absque veritate ! Sicuti enim magnâ lignorum strue appositâ ignis extinguitur, ita multâ ciborum congerie, ventriculi tonus & fermenti activitas debilitatur, cruditates in corpore cumulantur, quæ tūm ad nostrum, tūm ad alios affectus producendos non ineptæ : *Qualitate* peccant alimenta nimis refrigerantia, humores crudos & viscidos

scidos suggestentia, qualia sunt lacticinia, pultacea, leguminosa & hujus comatis alia, quæ minus laudabilem præbent sanguinem. Idem faciunt fructus horarii, oleracea, pinguia minus correcta & contra sanitatis regulam devorata. *Dulcia* quòd naturam confortent, maximoperè extolluntur à mulierculis nonnullis ; hinc toto die ingeuntur saccharata ; sed quamvis vires augere videantur, succum tamen substantificum non exhibent, bilem potius augent, eamque luctucentam, viscidamque reddendo ad obstrunctiones facilè disponunt.

Modò haud dispari comparatum est cum *potu*. Hic liberè hau-  
stus efficax existimatur, præcipuè *aqua frigida* & *palustris* immodicè  
ingurgitata Autore *Philos. l. 3. & 4. de gen. animal.* Ventriculò enim  
eàdem refrigeratò, *duæfia* enascitur, succi inutiles generantur,  
cacochymiam facilimè inducentes. *Cerevisiae feculentæ*, crudæ, lu-  
pulò minus conditæ idem adscribendum venit. Potulentorum ge-  
nerosiorum ingurgitationem, eamque insequentem ebrietatem, quæ  
mulierculis nonnunquam non infreqvens, inculpat *Hippocrat. lib.  
de aér. aq. & loc. & Galen. l. 11. de usu part. c. 10.*

*Atrœxia* &  
*anæmia* propter strenuam cruditatum adcumula-  
tionem ex interruptâ coctione primâ summè noxiâ, nec in secundâ  
& tertiatemendabili, quid possint, explicatione non indiget. In tem-  
pore non venire ubique molestum. Pertinent huc medicamenta,  
quæ peculiari virtute sterilitatem inducere dicuntur, ubi ex *Vegeta-  
bilium regnō famosa* sunt : ruta, mentha, agnus castus, sabina, cicu-  
ta, filix, lingva cervina & omnia ferè splenetica, si *Eresio bistor.  
plantar. lib. 9. cap. 22.* habenda fides, qui tamen experientiam non  
habet suffragantem. *Opium*, de quo *Renodæus lib. 1. secl. 10. de mat.  
med. cap. 2.* prodit, quòd libidinis cestrum potentius coérceat, atque  
earnis motus ignavos reddat, à *Garzia l. c.* cui nec *Willis pharm.  
rat. diatr. 1. s. 7. c. 2.* contrarius videtur, huc etiam refertur ;  
quamvis *Verulamius bist. vit. & mort. p. 526.* manifestò Venerem ex-  
citare affirmet, ad stipulantibus *Cardano*, *Scaligero*, *Monarde*, *Saa-  
rio*, *Mandelslo aliisq; rerum Indicarum scriptoribus*. Gordium  
hunc nodum solutum vid. *post. D. D. Sachs. observ. 69. An. 2. Ephem.  
Germ. dec. 1. p. m. 126. in Excell. VVedel. Opiol. l. 2. s. 2. c. 7.* *Cam-  
phora*, quæ apud Veteres maximè suspecta, metuenda non est, nisi

usu frequentiori peccetur, ubi ob partes  $\Delta$ eas, subtileas, purissimas, fali volatili remixtas, fortiter penetrando, similes in sanguine obvi-as dissipando imbibendoque refrigerat quadantenus ; sive, ut *Hel-montius potest. med. §. 4.* explicat, archeum subigit aut fugat, Ve-naremque infringit. *Ex regno minerali accusantur sapphirus, gaga-tes, smaragdus* tempore cohabitationis gestati ; de quibus fides esto penes Autores : It. *auripigmentum, calx viva* utero imposita, &c. *Nimius & al. usus*, sed contra experientiam, à nonnullis etiam in-culpatur. *Ex regno animali, caro turturum, animalium castrato-rum, serpentes, gallorum intestina* in cinerem redacta, &c. *Stricta vestimenta* & Gallicô illô, quod vocant *planchette*, armata, quibus se graciles & agiles reddere nituntur delicatulæ mulieres cum insi-gni valetudinis dispendio, suum etiam hūc conferunt symbolum. vid. *Franc. satyr. med. de planchett.*

SOMNUS ET VIGILIÆ etiamsi ad conceptionem parùm facere videantur, attamen mediocritatis terminos si transcendant, nocent. *Ille* immoderatus diutiùs retinet excrements, quæ retenta corpus adgravant, calorem nativum infringunt, & obnubilatô spirituum lumine torporem ac pigritionem inducunt : prævalentibus autem vi-giliis, spiritus dissipantur, consumuntur, unde insignis corporis de-bilitas. Quapropter *Huartus scrutin. ingen. c. 5.* haud frustra di-xit, quod is, qui somnō se privet, necessum habeat, ut plurimis affi-ciatur morbis

MOTUS & QUIES attentionem quoque merentur. *Motus corporis* nisi excedat, neque incommodo instituatur tempore, sangvinis ventilationem promovet, fuligines expellendo illud repurgat, & leni diaphoresi crassos & lertos humores discutit : quod è contrario flaccidum reddit quies, & excrements cumulando ad plurima incommoda disponit. Hinc delicatores, vitam sedentari-am & otiosam ducentes pluribus iisque vehementioribus morbo-rum insultibus, adeoque conceptus interceptioni, sèpiùs expositas videbis, præ aliis vilioris conditionis mulierculis, quæ sanitate fru-nuntur liberiore eaque magis constanti, unde & numerosiori bean-tur sobole, labore ac motu firmante harum corpora. *Immodicæ vicissim exercitationes, spiritibus exhaustis & enervatis, artus de-lassant,*

lassant, & totum corpus debilitant, quod efficiunt exercitia virilia, equitationes, saltus, venationes, lucta &c. Inde Magnatum conjuges, ejusmodi exercitiis deditæ, minus fœcundæ creduntur, quod Hippocr. de Scythis olim etiam perhibuit loc. cit.

EXCRETA & RETENTA legitimè sibi non respondentia varias in fabricâ muliebri dare solent turbas. Natura enim cùm gaudeat emunctoriis pro excernendis superfluitatibus, si excrementa, serosa imprimis, nec per cutis poros insensibili transpiratione evaporent, nec per urinam, nec per alia loca particularia evacuentur, aliorum sibi viam quærere coguntur, atque ad uterum, commune aliàs impuritatum in sexu viliori receptaculum, faburrâ depositâ, arvum genitale à constitutione naturali, facilimè avertitur ac sine fruge relinquitur. Evacuationem lunarem terminos transgredientem fœcunditatis hostem fieri ex cap. 4. patet. Idem adscribendum dicit Bened. Sylvat. c. 4. obs. 64. hæmorrhoidibus diutius fluentibus. Foniculum diu apertum sterilitati patrocinari tradunt nonnulli, sed contra rationem & experientiam.

Quæ cum Messalina, portentosæ libidinis fœminâ,

Quæ resupina jacens multorum absorbuit ictus

& lassata viris, nec dum satiata recessit,

certamen ineunt in Veneris palæstrâ aut tardius eandem ingreduntur, viam ad conceptionis abolitionem sibi pandunt facilem. Illud prostibula in tabernis meritoriis, vulgatô corpore, quæstiuncula venari solita; hoc serum ineuntes conjugium probant. Abstinentia enim & actus venerei longior intermissio in humidis & optimè constitutis corporibus varios gignit morbos, præsertim inflammations periculosas, ait Verulamius sylv. sylvar. cent. 7. p. m. 893. plura de his vid. apud Conring. de hab. German. causis. p. 43. Jason. à Pratis de uter. l. 1. c. 8. Sennert. l. c.

ANIMI PATHEMATA, quæ sexum sequiorem valdopere exercere assolent, suâ non vacant culpâ, etiam quoad hunc affectum. Potissimum autem mœrore, terrore, aliisque tristibus animi affectibus emaciatae, occasionalem infœcunditatis præbent causam, spiritus de statione suâ pellendo, flammulam vitalem suffocando sanguinisq; crasis invertendo. Ita mœrore & pavore subitanè quasdam steriles

factas observavit *Sinibald. l. 6. Geneanthrop. tract. 2. cap. 2.* De irâ, odio & Zelotypiâ idem pronunciandum esse, quotidiana testatur experientia. Hinc iracundæ, & odio nimis indulgentes vel absque fœcundis matrimonii deliciis vitam transigunt, vel immatuos fructus citius dimittunt. Fœcunda Clinopale sedatos poscit animos & compositos, inimicâque adversatur oscula. Invitos amores steriles esse, desideratos verò dulces dixit *Aetius lib. ult. de odio c. 29.* Nec effusum gaudium culpâ vacare videtur omni, cum propter spirituum jacturam & effusionem periculum minitetur virtuti prolificæ. Omnium autem maxime inculpanda tristitia ob suppressam flammulam vitalem & spirituum algorem. *Venus* enim leta diligens, jucundos & amicos efflagitat amplexus, à tristibus præcipue curis alienos. Hæc enim juxta Poëtam,

*non solet in mæstos leta venire toros,*  
neque etiam foeminam, cohabitationis tempore plorantem, fœcundare, nec gemebundam prolis reddere vult participem. Asserti patronum nominamus *Mercurial. lib. II. de morb. mulier. c. 2.*

## C A P U T VII *causas adducit præternaturales.*

**E**X CAUSIS PRÆTERRNATURALIBUS, quæ cum reliquis ita compositæ, ut una alterius sit fomes & incitamentum, attendi debent, corporis totius cacochymia eamque insequens cachexia, quam sæpè sterilitatem comitari testantur practicorum monumenta. Utteri item dyscrasia, intemperies, fluor albus, uteri procidentia: In maritatis, partus difficiles, abortus frequentes, improvida secundinorum avulsio, partium genitalium refrigeratio, aliq[ue] dispositiones morbosæ.

Huc spectat uteri & ovariorum resectio, cuius exemplum suggerit *Nob. D. D. Volckamer. Ephemer. German. dec. I. ann. 6. & 7. obser. 72.* seu castratio, quæ olim apud gentes quasdam fuit familiaris,

liaris, veluti ex *Alciat.* in *l. spadon.* ff. de verb. sign. & lib. 4. antiqu. lect. cap. 10. adducit *Kornemann.* de virginit. jur. c. 16. *Schenck.* l. 4. observ. 326. *Wierus de prestig.* *Demon.* lib. 4. cap. 20.

*Molam* sèpè uterum infestare, ut immodicum sanguinis profluviū sterilitas interdum subsequatur, scribit *Mercat.* l.c. c. 3. Ex strangulatione uterinâ eundem provenire autor est *Hippocmt.* l. 2. de morb. mul. Sic etiam ἀΦοργή fiunt, quando αἱ μῆτραι πέσος τὸ ἴχυον ἐναργέως, uteri ad coxendicem eminent, juxta eund. lib. de nat. muliebr. sect. 5. p.m. 128. Idem accidit ex morbis acutis & chronicis viscera naturalia debilitantibus, coctionum leges invertentibus, quales sunt febres omnis generis, hydrops, paralysis, dysentriæ viscerum, sive sunt nativæ, sive aliunde prognatæ, *Variola Gallica-næ*, *elephantiasis*, *Phtisis* &c.

Trahendi quoque in hunc censum veniunt morbi conformations; de quibus, cum cap. 4. satis prolixo fuerimus, crambem bis constam apponere noluimus.

*Omentum* p. n. pingue & os uteri comprimens inculpat, ut mihi videtur, absque culpâ *Hippocr.* 5. *aphor.* 46. durum aliud, crassum & lapideum *Panarol.* pent. 3. obs. 10.

Uteri inflammatio, cancer, ædema, erysipelas; de quorum diagnosis & curatione admodum prolixus est *Vidus Vidius* tom. 5. oper. pract. lib. 11. cap. 15. & 19. Huc etiam faciunt, ut & ejusdem & tubarum hydrops. vid. *Tulp.* lib. 4. observ. med. cap. 45. de *Blegny* l. c. An. 1. Mens. Jun. observ. 9.

## CAPUT VIII differentias evolvit.

Absolutâ causarum serie, differentiae, quæ & ad prognostin, & ad curationem planam ostendunt viam, methodo receptâ nunc veniunt explicandæ. Ast, cùm plurimæ, eas solummodo enumera-bimus, quæ desumuntur vel à genere, vel à subiecto, vel causa, aliisque circumstantiis.

A genere desumptâ differentiâ, sterilitas alia est nativa, & à primis incunabilis congenita; alia adscititia, quæ post ortum tem- poris

poris successu ab errore plerumque externo nascitur. Sic *aliae* steriles sunt absolutè & simpliciter, quæ nunquam concipere possunt, etiamsi hujus vel illius viri utantur consuetudine; *aliae* comparativè, & respectu ad maritum, ita, ut in primo conjugio steriles, in altero, alii junctæ viro facile imprægnentur: *aliae* tantum ad tempus, ob affectum quendam uterinum, quod curatō concipiunt: *aliae* pepererunt quidem, postea ob vitium in puerperio contractum nullam ulterius enituntur sobolem.

*Alia* sterilitas quoque est manifesta, cuius causa evidens & cuius facile reddi possunt rationes: *aliae* occulta, quæ à supremo Numine, interdum ab incantatione, dæmonumque præstigiis originem deducit.

*Ratione subiecti*, *aliae* est universalis, à totius corporis intemperie & morbosâ dispositione exorta: *aliae* particularis, à parte quadam malè affectâ proveniens: *aliae idiontæ ðiññ*, quando vitium organis, generationi inservientibus inhæret, *aliae συμπαðiññ*, quando aliunde communicatur.

*Causarum ratione*, tot numerantur differentiæ, quod causæ à rebus supernaturalibus naturalibus, non naturalibus & præternaturalibus peti potuerunt.

## C A P. IX.

### *signa eruit diagnostica.*

**H**Ac tenuis causas & differentias recensuimus, nunc etiam ad signorum fontes progredimur. Ορθῆς θεραπείας πηδάλιον θέντη διάγνωσις. *Internatio rectæ curationis fundamentum est*, inquit Trallianus lib. 9. c. 1. Hæc verò cognitio absq; signis certis nulla est. In quantum enim dignoscenda morbi præsentia de signis nobis constiterit, tantum in curatione feliciter absolvenda obtinebimus. Et quamvis symptoma hocce in se consideratum spontè pateat, nec pluribus indigeat signis distinctivis, è re tamen fore arbitramur, ordine suô eadem perpendere, quæ sunt vel *diagnostica*, vel *prognostica*.

De *diagnosticis* in antecessum monendum, quod experimenta quædam instituantur à quibusdam, ut scilicet patefiat, *utrum viri, an fæmina*

*minea culpa sôbolis generatio sufflaminetur?* Si utriusq; semina, (verba sunt *Mercati* ex *Avicenna & Rhæse l. sèpè cit.*) projiciantur in aquam, quod supernataverit, sterile judicetur. Sed cùm hæc seminis probandi ratio impia, homine Christiano indigna, neque veritati congrua, meritò ut turpis & falsissima exploditur. Simili modo nec ex reliquis experimentis ibidem recitatis certi quidquam hariolari possumus, quare ceu irrita, inania & ab honestate remota jure rejicit *Sennertus loc. alleg.*

Certiora, imò *tutiora* sunt signa, si inquiratur, num causa infœcunditatis resideat in viro? quod ex iis, quæ aliàs Autores de impotentia virili producunt, facile dispalescit; nempè si in viro nihil vitii deprehendatur, illud in fœminam rejiciendum.

Hinc *ratione generis* sterilitatem indicant, *color faciei pallidus, propensio in somnum, sedati animi gestus,* quando nullus planè, aut exiguis adeat *Veneris appetitus,* quando ante & in caitu nullam percipiunt voluptatem. Certissimum exhibit signum & infallibile, quando mulier secundâ & tertîâ vice, cum viris diversarum complexionum matrimonium inierit, ex nullo tamen imprægnata fuerit.

*Subjecti ratione, partium affectarum signa ex functionibus eorum variè læsis patefiunt.* Sic uterus & ovaria hòc malò affecta, intemperies æque totius ac partium manifestat. Vaginæ aliarumq; partium externarum læsionem ægræ relatio & circumstantiarum consideratio sedula patefacit. Organa genitalia per effentiam labrare indicatur, si nullus in diæta vel aliis rebus non-naturalibus commissus error; per consensum verò, si aliarum partium dispositio prava præcesserit, vel totius corporis male affecti indicia sese exhibuerint.

*Causarum diagnosis est abundans, prout ipsæ causæ sunt patentes.*

## C A P U T X.

### *prognosin instituit.*

**D**E morbi eventu dicturis spectandæ sunt triples prædictiones, quæ sicuti in quolibet, ita & in præsenti in eò versantur, ut I. E even-

eventum morbi 2. durationem 3. modum eventus determinant.

(1). *Eventum, quoad salutem & mortem, quod spectat, mortis periculum quidem non minatur malum ; cum tamen individuo & speciei detrimenta afferat haud indemnia, nec salutare, nec lethale verè pronunciari poterit. Est enim sterilitas matrimoniorum perturbatrix, maximas conjugibus creans molestias, potissimum mulierculis, quas præ fœcundis magis morbosas, tardiusque his senescere, non sine ratione & experientia dixit Avicenna loc. cit.*

De futurō eventu : *an curabilis sit affectus hicce ? ex causis antecedentibus optimè dignoscitur. Infœcunditas ab ortu contracta parum salutis pollicetur, si Arist. l. 2. de gen. animal. fides facienda. Quapropter eam in genere à solo Deo curari posse afferit Avenzoar 2. th. tr. 5. cap. 1. quod tamen absolutè non concedit Mercurialis l.c. quandoquidem potenti adjutus medicamine archeus sœpè vincit morbum, fœtumque dat feliciter. Nam si ægra ætate gaudet vegeta & ab erroribus naturæ non adeò magnis oriatur sterilitas ; si à cacochymia ; si à mensibus delinquentibus, aut vitiô aliò uteri non enorimi, spes affulget tutæ & jucundæ curationis.*

*Si verò nativa, vel in habitum quasi degenerata uteri dispositio p. n. aut alias morbus incurabilis præcesserit, omnis spes inanis, & incurabilem relinquit affectum. Morbi conformatiois in numero deficiente, aut alii graviores, parum spondent salutaris restitutionis. Huc pertinet illud Hippocraticum lib. 2. prognost. Sterilitas ex ulceribus difficulter curatur. Imò etiamsi curentur ulcera, propter cicatrices ibidem relictas steriles erunt foeminæ, lib. 1. de morb. mulier. Si à fascino proveniat, difficilis est curatio, sed non impossibilis, ad stipulante Nobiliss. Dn. D. Wedelio l. 2. de medic. facult. sect. 2. cap. 13. & part. 2. theorem. med. sect. 5. th. 18. Sedulò igitur prospiciendum, num curari possit affectus nec ne, ne generosis remediis frustra adhibitis, famæ & existimationi suæ male consulat Medicus. Cum autem ejusmodi sterilitas cognitu admodum difficilis ad empirica, incerta, sœpe ridicula & superstitione confugiunt experimenta, quæ ex doctoribus suis haurienda. Hippocr. 5. aphor. 59. experi-*

experimentum, an infœcunda curari possit, fieri jubet suffitu per inferiora excepto, quod amplectitur *Lotichius observ. med. lib. 5. cap. 1. obs. 13.* viam & modum monstrante *Lindenio phys. med. cap. 6. art. 8.* Huic *Cardanus* tantam tribuit fidem, ut etiam virginibus adhiberi suadeat, priusquam marito tradantur. Omnimodam certitudinem experimento inesse vix credimus; siquidem Autore *Riverio lib. 15. præx. c. 15.* à Medicis interdum hoc cum aliis ejusdem comatis, in usum vocari solet in gratiam Principum & Magnatum, quibus sterilitatis causa facere licet divertium. Virgines, ait *D. Dieteric. in Jatrea*, in se quidvis aliud potius admitti patientur, quam odoratum hoc infundibulum.

(2.) *Duratio* ex sterilitatis natura desumitur, cujus ratione morbis chronicis adnumeratur, qui longum postulant curationis tempus. Patientia hīc opus. Natura enim sui juris ad humanas raro componitur leges, modò properat, modò lentes necit moras. Non semper festinat foecunditas, aliquando dilatata pleniores parit fructus, *inquit B. Rofincius.* Causæ quo altiores egrent radices, & quo major à statu naturali recessus, eò diutiùs retardant restitutionem, majoremque insumunt medicaminum adparatum. Experientiæ tamen suffragiō constat intra aliquot mensium decursum, sublatis causis, alacriter affectas Veneri litasse feliciterq; concepisse.

(3.) *Eventus modus* ad salutem fit, cùm archeus auxilium adeptus per medicamenta, corpus ab humoribus vitiōsis, aliisq; impuritatibus liberat, illos discutit, per varia secretoria quovis modo evacuat, depletionem lunarem in ordinem redigit, M. S. & partibus genitalibus vigore naturali restitutō. Si verò corpus senile, cachexiâ inveteratâ, aliōque morbō graviori diu vexatum offeratur; si sterilitas congenita, aut aliō errore organicō insigni orta, tūm sanè nullus sperandus salutaris eventus, omnis sobolem pariendi spes concidit & collabascit.

## CAPUT XI. *ad curationem facit accessum.*

**E**xpliCatâ hactenus felicibus auspiciis morbi naturâ cum suis causis, differentiis & signis, curationem nunc facilius adgredimur, observatis indicationibus, usitatis ex fontibus depromendis.

**INDICATIO CURATORIA** tota in eô erit occupata, ut humores peccantes quilibet in corpore & sanguine corrigan tur, eliminentur, obstruktiones & conformatio nis vitia, si quæ in organis generationi velificantibus occurrant, quantum possibile, tollantur, & ad constitutionem naturalem reducantur, peculiares partium, imprimis uteri, affectus amoveantur; ac ipse archeus confortetur, corroboratô corporis vigore specificis & analepticis.

**PRÆSERVATORIA** removendis causis invigilat, & ne ad mali propagationem ulterius concurrant, sedulò prospicit. Hisce enim nisi obviam eatur, frustrâ erit omnis curatio. Novâ quippe materiâ iterum collectâ, symptoma continuò capit incrementa, nec Medicus unquam speratum obtinet finem.

**VITALIS**, vires tâm totius, quâm partium genitalium respicit, alimentis optimè nutrientibus & medicamentis aphrodisiacis in tempore reficiendum, ac per alia appropriatâ succurrentum præcipit. Hisce indicationibus ut satisfiat, Medicus selectô auxiliorum adparatu, ex triplici gazophylaciô desumendô instructus esse debet, alias similis est levis armaturæ militi, qui referente *Alexandr. ab Alexandr. l. 2. genial. dier. cap. 13.* rudibus & parum nitidis armis, vel strigosiori equo & macie confectô utebatur, ad impetus hosti faciendos minus idoneis.

## CAPUT XII. *fontem aperit chirurgicum.*

**C**hirurgia varia ea que diversa subministrat præsidia & auxilia, è quorum numero affectui nostrô conducibilia proferemus. Inter illa prima tenet subsellia generosum & vitæ humanæ maximè proficuum

euum & sæpè præsentaneum auxilium, *Veneratio*. Hæc quamvis ob intemperiem frigidam & humidam, quæ in plurimis venit corrigenda, parum emolumenti afferre videatur; causarum tamen & circumstantiarum ratione sæpè locum invenit. Nam, si ex tributi lunaris defectu & collectâ inde sanguinis vitiosi copiâ conceptionis læsio provenit, utique V. S. nullum utilius sub sole existit remedium, loco & in tempore administratum.

Parili modô mensium depletio nimia ubi in culpa, omnia plerumque frustra impenduntur, nisi celebrata fuerit V. S. quæ vel sola medelam afferre solet. Ita in obesitate exuperante, cum sanguinis copia diminutionem imperet, ne pondere natura gravetur & mole, & ob permixtos humores alios ad partes affuentes, curationem retardet, optimô cum successu in usum vocatur.

Cæterum cucurbitulæ V. S. vices sustinentes, urgente necessitate sat commodè substituuntur; magis tamen scarificatæ, quâm siccæ, quæ, teste *V. Valerio meth. med. p. m. 204.* parùm operantur & sanguinem saltem ab unô locô in alium trahunt. *Hæmorrhoidibus* curatam vidit conceptionis læsionem *Fabr. ab Aquap. part. 2. oper. chirurg. c. 97.*

*Fonticulos*, etsi ab *Helmontio*, *Martiano*, *Primeroso*, tanquam remedia parum aut nihil juvantia rejiciantur, in nostro affectu, parti crurum sylvestri inustos, insigni cum fructu nonnunquam in usum vocari posse, confidimus, quoniam humores ad partes debiles deferri consuetos, successive invertunt locoque aptibri eliminant. *Setaceum* quid conferat, edocet *Hildanus cent. 1. c. 4.* ubi profluviu[m] album & inde ortam sterilitatem eô felicissimè curavit.

*Flagella*, quibus Romanorum mulierculæ, sterilitate laborantes, Lupercis februantibus se offerebant, cum remedium crudelius, commendare nolumus, ne ipsi in sexum verecundum crudeles videamus. Nihilominus legi possunt, quæ de ejusmodi curâ ex *Festo Pompejo & Dempstro* recitat *Illustris Barthol. epist. de flagor. usu in remed. p. 22.*

*Morbi conformatio[n]is*, nisi profundè lateant, unicè auxilium expectant à chirurgia. Atretæ enim sive velatæ ad conceptionem aptæ reddi non possunt, nisi pudendorum orificio clausum, factâ scalpellô acutô incisione, aperiatur, hâc tamen cum cautelâ, quam

*dat Sylvius lib. 3. med. prax. c. 5. §. 75.* ne lædantur carunculæ myrtiformes, partesque ipsis adnexæ: hac peractâ & sanguinis fluxu *izquierdo* sedatô, vulvæ fistula plumbea indatur, medicamentô epuloticô illita, ne labia iterum coalescant, usque ad perfectam consolidationem. Ubi & illud insimul tenendum, quod membrana superflua, si adsit, consumenda tollendavé, vel medicamentis erodentibus, sive cauteriis potentialibus, vel cultello forficibusque.

Eodem ferè modō curatur *occlusio orificii interni* à carunculâ, nisi quod ante operationem, imò in operatione ipsâ opus habeat chirurgus *speculo uterinô*, in fine itidem fistulâ perforatâ, quò cicatrix melius inducatur.

Plura de hac operatione tradunt post *Corn. Celsum & Aëtium Aquapend. l. c. 84. Scultet. armament. chirurg. p. 1. tab. 43. Barbette oper. chirurg. part. 1. cap. 13.* Similiter inutile & sequiori sexui molestissimum tentiginis incrementum aliæque excrementiæ & sarcinata, instrumento ad polypi excisionem adcommodatô, auferuntur, ductu sœpè laudati *Aquapend. lib. alleg. c. 86.* quæ ablatio, testibus *Bellonio & Paulo Jovio, Äthiopibus, Ägyptiis, aliisque fœminis orientalibus maximè usitata & necessaria.*

## CAPUT XIII.

### *pharmaceutica remedia adducit.*

**R**elicto fonte chirurgicô ad pharmaceuticum progredientes, egregia offendimus auxilia ad debellandum hunc hostem maximè aptata, quæ dogmaticorum more, singula suis loculis reposita, trademus. Cùm autem pro causarum multitudine & diversitate curatio, modò ad totum corpus, modò ad uterum ac reliquas partes genitales sit dirigenda; medicamenta quoque dividantur in universalia, quæ corpus universum magis respiciunt, & particularia, quæ parti potissimum laboranti succurrunt: ita in sterilitate, ab humoribus in corpore & uterô abundatibus, oriunda, universalia neutram debent prætermitti. Hinc agmen ducunt

**L**ENIENTIA, quæ sicuti in quovis ferè morbō conducibilia; ita speciatim & in nostro conveniunt, & quidem tantō magis, quòd *partim* per se indicata, primas vias ab impuritatibus repurgant, intestina blandè abstergunt, sordesque collectas ad inferiora divertunt; *partim*, quòd aditum præparant faciliorem medicaminibus cæteris. Adde & hoc, quòd mulierculæ delicatores purgantia fortiora non æquè sustinere valeant, hæc verò purgantium vices excipient. Ex plurimis laudamus *passul. min. mann. calabr. decoct. prunor. syr. ro-sar. solut. & aloëtica*, qualia sunt: *Pil. aloët. Eftens. Glaffian. Fr. Quercet. Gal. Dn. D. Præf. &c.* quæ pro lubitu acui & exaltari possunt. Species laxantes pro infusione & nodulis cum uterinis remixtæ, quoniam notæ atque in practicorum analæctis largâ manus consignatae, prolixiorem enarrationem hic non efflagitant.

*Clysteres lenientes*, additis uterinis clutrientibus & abstergentibus, ob uteri viciniam usum pollicentur non condemnendum, propterea nec laude suâ privandi.

**P R A E P A R A N T I A** lenientibus nunc adjungenda, quæ pro diversâ humorum naturâ & corporis dispositione, varia esse solent, potissimum ex incidentium, attenuantium & aperientium familia, inter quæ *Gal*ia reliquis palmam facile præripiunt, dum pituitam disponunt ad exitum & obstructiones, si quæ adsunt, reserunt, unde optimô jure ab *Excell. VVedelio* sterilitatis panacea salutantur, & si humores acidi, austeri, acres deliquerint, absorbentia, præcipitantia & invertentia maritanda, omnia pro judiciô cordati ac prudentis naturæ ministri: Talia sunt *Θ artemis. absinth. croc. ♂ aperit. Θ digestiv. pulv. cacheet. Quercet. Mixt. S. ~ aperit. Penot. Ra ♂ pomat. cydon. Eff. ♂ absinth. Eff. ♂ Ⓛlat. c. R. papav. rhæad. combi-na-ta & similia.*

Præparatis humoribus **P U R G A N T I A** propriè sic dicta essent producenda, ut ablatis succis inutilibus humores aptarentur ad contagium seminale suscipiendum, sed, quoniam notissima & ab artis gnarô, facili laboris impendiô in variis formis præparari & præscribi possunt, tempus & paginam in iis recensendis insumere nolumus. Ea propter B. L. ad autores, qui de morbis mulierum commentati sunt, remittimus, ubi amplam horum reperiens farraginem.

VOMITORIA mira interdum in hoc affectu præstant, impri-  
mis ab incantatione exortō, autore B. D. D. Michaelis. ubi *belleborus*  
*niger*, *Siam* & *Blica* eximiè se gerunt.

DIAPHORETICA, post sensibiliter evacuantia, cacoehymiam  
& cachexiam feliciter exhauiunt, humores pravos discutiendo & ab  
uterō repellendo. Laudantur præ cæteris Bezoardica mineralia v. g.  
*Bezoard. mineral.*, *24le*, *♂le*, *♂diaphor.* *C. C. phil. ppt. mag. eboris*, *♂*  
*♂al. cacheet.* *Salia fixa* : *cent. min. matricar. meliss.* Item *R. Be-*  
*zoard. acid. Eff. theriacal. lignor.* & *Effent. lign. sanct. theriac.*  
*Androm. Mithridat.* Quò etiam pertinent volatilia : *R. Bez.*  
*vol.* & *lig. CC.* & *eboris succinat.* *Θ vol. succin.* *C. C. ebor. vipe-*  
*nar. flor. \*ci*, & *Θ \*ci*, cum *οοis* uterinis aliisque congruentibus  
amicabili connubio maritatus. *Decoct. lign. Guajac. simpl.* & *com-*  
*pos.* (cujus descriptionem dat *B. Rofinc. ordin. & method. consult.*  
*conf. 2. lib. II.*) *decoct. lignor. cum rad. sassafrill.* commixtum iti-  
dem convenient ; & hoc in passu *Sassafras* vel in decoctō vel essen-  
tiā vel *R. princeps* decantatur remedium à pluribus. vid. *Baubin.*  
*histor. plantar. lib. 4. cap. 33.*

DIURETICA ad extirpandam infœcunditatem admodum  
idonea, quoniam vasorum genus permeando, quicquid vitio-  
si offendunt, ad renes deducunt, ut unà cum urina per vias or-  
dinarias eliminetur, sicque uterus impuritatibus refertum egregiè  
mundificant. Laudem ex multis merentur & *Θis*, *⊕li*, *♀ri*, *Ra*  
*violar. rosar.* & *aperitiv.* *Penot. Clyff. ♂ ♀nat.* *♂at. D. D. Præsid.*  
*R. ♂variæ c. arcan.* *♀*, *R. aperit.* *Mæbii*, *Zwelferi*, & *terebinth.*  
*♀al. Zobelii*, *arcان. duplicit. arcan.* *♀*, *lap. ♂. Pil. de therebinth.*  
quarum usu frequenti per ver & autumnum sterilitatem curavit.  
*Ballon. lib. 3. consil. 30.* Peccante corpulentia nimiâ, præmissis præ-  
mittendis, *pil. de sandanaca Mysichti*, nec non *sassafrata* ante lau-  
data egregia sunt.

ACIDULÆ ET THERMÆ, *Carolinæ*, *Spadanæ*, *Swalbacenses*  
&c. internè usurpatæ, purgatō prius corpore per omnia ferè e-  
munctoria, hic & alibi locum inveniunt sat commodum. Fœcun-  
diores enim faciunt fœminas & partes longiori præclusas sterilitate,  
ad conceptum fœlicissimè relaxant. Hinc *Fonsecat. 2. consil. 71. in*  
*aquas*

aquas Tetuccianas, Capivaccius & Trincavell. l. 3. consil. 79. & seq. in Aponenses, Aquarianas & D. Petri primariam hujus mali curationem rejiciunt.

Post universalia exhibeantur remedia PARTICULARIA ALTERANTIA, sterilitati adsignata & per experientiam à Practicis comprobata, quæ sanguinis, uteri, aliarumque viscerum dyscrasias desiderant, corroborandi simul, & specifica, quod vocant, virtute conceptum juvantia, quorum jam sub universalibus ex parte mentionem fecimus.

Et quoniam frequentissima infœcunditatis causa est cacozymia seu status corporis pituitosus, ita ut lympha, uterus, pori, oviductus & ovaria minus bene sese habeant, *& alia* suprà recensita optimè indicationibus suis satisfaciunt. His enim solis adhibitis curatam refert fœminam *Celeberr. Wedel. in not. ad casus Timæi*, quæ oþo circuitur annos in sterili vixerat conjugio, ut multorum liberosum mater fuerit redditæ.

In sterilitate à flatibus uterinis carminativa in genere svaderi debent: *Helmontii & sepe citati Dn. D. Wedelii experimento laudissima sunt semina quatuor calida majora, vid. tract. de med. facult. lib. 2. sect. 2. c. 4.* Adde his *Monardi de ligno sassafras*, quod habet *Bauhinus histor. plantar. l.c. plura affert Vidus Vidius d. l. cap. 19. p. 685.*

Cæterum SPECIFICA, quæ ab Autoribus hinc inde commendantur, sunt vel roborantia & stimulantia, vel humectantia & munificantia. Præ omnibus magni æstimantur medicamina ex satyriõ facta. Sic hujus effent. à Crollio descriptam, mirè extollit *Rivarius*, in vino Malvatico si exhibeat. Θ ejusdem vol. *Hartmannus* in vita mulier. albo vel vino Hispan. sumtum, quô multas restitutas scribit *Grulingius*. Rad. item eryng. condit. sem. seseli, ammios, erysim. NM. anthophyll. omniaq; aromatosa, succol. Ind. &c. Et quamvis stimulantia hæc in fœminis non æquè locum invenire videantur ac in viris, quandoquidem in se & à naturâ lasciviam habeat mulier, adeoque *Hippocrate* monitore, semper indigeat moderatore; ex parte tamen convenienter, quatenus non tam stimulant, quam calorem debilem firmant & roborant. Porrò famosa sunt *uter. & coagulum leporis, vulv. & uter. cervæ ppt. testic. vulp. & apr. ppt. præcipue si cum effent. ex secundin. mulier. facund. parata propinen-*

tur. & secundin. primipar. quæ filium enixa, Essent. testicul. apr. cerv.  
 & essent. formicar. maj. essent. contra sterilit. Mynsichti, Michae-  
 lis, Extractum contra steril. ejusdem. Ra Corallior. saffrafrat. Essent.  
 ♀is Oli, ac manna Oli à Schrödero lib. 3. pharm. med. chim. c. 26. de-  
 scripta, & decantatissima illa mulierum medicina, tryphera magna, ex  
 quibus mixturæ, electuaria & pulveres facili labore confieri  
 valent. Pulv. Veronice per dies aliquot usurpatum laudat Sim. Pau-  
 li Q. B. p. 513. magisterium suum Zwæffer. pharmacop. Reg. pulv.  
 secundin. human. Riverius, quem tamen sterilitatem inducere asse-  
 runt Hæferus & alii. ♂ majoran. Nat. coagulō leporinō remistō  
 & moschi tantillō, arcanum conceptui facilitando nulli referandum  
 autumant Pena & Lobelius stirp. adversar. nov. p. 213. Decoct. pomor.  
 Mandragoræ cum vino, Langius: Hoc, quâ ratione lœfæ conceptioni  
 adversetur, inquirit Casp. à Reies in Elys. camp. quæst. 43. §. 5. & seq.  
 Heliodæus Paduanus in observat. commemorat, ex usu brodii, in quô  
 carnes viperinæ decoctæ erant cum columba juvene, mulierem quan-  
 dam leprosam ita convaluisse, ut semper antea sterilis fœcunda e-  
 vaserit.

Plura specifica hīc recensere nolo; quæ apud Botanographos  
 & Practicos largâ manu hinc inde adnotata reperiuntur & partim  
 jam dicta, partim apud eosdem evolvi merentur; veluti de pome  
 aurantior. dulci excavatō & cum croco in furnō assatō Hertodt. Cro-  
 colog. curios. cap. 70. num. 1. de placentulâ mentastri coronæ instar  
 effigiatâ pectiniq[ue] appositâ. P. Borellus cent. 1. observ. 34. de cuminō  
 æthiopico, salvia hortensi, alchimilla arida, fructu & ♂ balsaminæ  
 &c. Jason à Pratis de steril. arcend. p. 214. Mathiol. lib. 3. commentar.  
 in Dioscorid. cap. 34. Bauhin. històr. plantar. lib. 27. cap. 90. Schenk. lib.  
 4. obs. 129. pag. 614. Id unicum adhuc notandum restat, quod in casu  
 dubiō, si sterilitas à fascinō originem sumere videatur, præter syaden-  
 das preces medicamentis prioribus addi possint, quæ aliàs contra in-  
 cantationes laudari soleant, ut *antirrhinum*, *filix*, *verbena*, & maxi-  
 mè quod deprædicatur, *hypericum* omniaq[ue] exinde confecta. Id  
 in talismodi casu satis commendari nequit Paracelsus lib. 3. de rebus  
 natural. cap. 5. & Angel. Sala l. de Essent. vegetab. c. 7.

Hæc & similia interna virtutes suas melius exerunt, si EXTER-  
 NA sive TOPICA eisdem adsciantur.

THERMÆ *naturales*, *♀eæ*, *bituminosæ*, *♂les*, *nitroſæ*, ad quas mulierculæ lobolis avidæ, tanquam ad asylum, optimô cum successu confugiunt, plurimum spondent auxilii, quando malum à cacochymia, uteri impuritatibus, obesitate exuperante, & si reliqua non juverint. Sic ante laudatæ, externâ suâ alluvione in infelibus ritè usurpatæ, intemperatam uteri constitutionem egregiè corrugant, singulare robur eidem fœnerantur, ac referatis vilcerum obſtructionibus posteritatis ſpem faciunt optatam.

*Artificiales* ſeu *balnea* ex dictis mineralibus adjectis vegetabilibus abſtergentibus, uterinis, etiam in illarum defectu parari poſſunt v. g. *berb.* *puleg.* *ꝝal.* *roſmarin.* *ſalv.* *matricar.* *origan.* *ſerpill.* *calamintb.* *artemif.* *bacc.* *laur.* &c. quibus urgente necessitate ex adſtrigentium claſſe admifeantur, *fol.* *myrtill.* *lentisci*, *rad.* *biſtort.* *tormentill.* *confol.* *maj.* *flor.* *balaufiōr.* *rosar.* *rubr.* &c. Sic species pro balneo *Mynſichti*, *Hartmanni*, *Sennerti*, aut quas Grembs. l. 2. *arbor.* *int.* & *ruinos.* c. 1. §. 12. p. 230. præſcribit, finitâ purgatione menstruâ optimô cum fructu in uſum revocantur. Ex dictis ſpeciebus etiam parantur *suffitus humidus*, per instrumenta idonea ſinu muliebri excipiendi, qui egregiè ſuam locant operam. *Sicci* ſi arriferint, adhiberi poſſunt faciles paratu *ex thure*, *myrrba*, *benzoë*, *ſuccino*, *masticke*, *caryophyll.* *aromat.* NM. *ros.* *vulgar.* & ſimilibus, vel in pulvere, vel cum mucilag. *tragacanth.* in trochiſcos formatis.

INJECTIONES ET CLYSTERES *uterini* pro parietum uterinorum & vasorum ablutione, exſiccatione & roboratione ex an- te dictis conſieri poſſunt, quales apud *Riverium*, *Mercatum* & alijs, qui de affectibus fœmininis ſcripferunt, ubertim extant. Et, ſi uterus ex ulcere aut vulnere laſsus deprehendatur, traumatica cum aliis congruentibus adjiciantur, ſvadente *Harveo exerc.* de partu p. 275. Ejusmodi metrenchyta, matronam diù ſterilem à vulnerato utero feliciter reſtituit *Nob.* *D.* *Volckammer.* Dec. 1. An. 10. *Ephem.* *German.* obſerv. 62. non omissis medicaminibus internis, ut poſtmodum proliferò imbre fœcundata quinque liberos perfectos ac fanos enixa fuerit.

PESSARIA & NASCALIA, niſi fastidierit verecundi ſexus pudor ex fol. *ꝝal.* & ejusd. ſucco, *matricar.* *meliff.* *arifol.* *rot* *maſtich.*

*stich. galban. &c. c. 80 spicæ, melle anthosat. rosat. præparata* valent, quæ per horas aliquot detenta non infeliciter cedunt. Exempla afferunt *Mynsicht, Riverius, Grembs, Heer*; qui posterior solò succō *ʒial.* eum aquis Spadanis & jusculis exhibitō, & injectō ex eodem succo, encolpismō duas steriles felicissimè curavit *observ.* 14. p. 177.

INUNCTIONES post balnea & suffitus ex oleis & linimentis roborantibus odoratis circa pubem & umbilicum non negligendæ, si modò uterus swaveolentia tolerare potest, e. g. 80 *cheir. nardin. majoran. caryophb. styrac. liquid. Žibeth. mosch. unguent. comitiss. c. 80 cydon. menth. anis. fœnicul. &c. Grembs. l. c. 80 formicar.* ad fœcunditatem mirè extollit, cuius descriptionem dat ibidem p. m. 231.

EMPLASTRA & CERATA uterina roborantia subumbilicali & lumborum regioni apposita, quæ continuò gestentur vel singulis noctibus usque ad ultimam, quâ menses erumpere solent, septimanam, huc etiam spectant, v. g. ex *ladan. eleet. alipt. moschat. thur. mastich. galban. styrac. c. 80 caryophyll. cheirin. & cera. Empl. promatric. de galban. tacamahac. de mastich. &c.* Huc refer cataplasmata *Forresti lib. 28. obſſ. 8. & sacculos ex meliff. calamintha, mentha a. matri-car. compos. & cum vino conspersos ac à Sennerto, Riverio, B. Rolfin-cio* aliisque commendatos.

Ad magneticam curam, quâ per transplantationem infœcunditatem abigere contendunt, nonnulli confugiunt; quâ de vid. post *Turnheiser. Tenzel.* in medicin. diaſtar.

## CAPUT XIV *diætam subnectendo dissertationi finem imponit.*

Superest postremò, postquam remedia pharmaceutica ad infœcunditatem exturbandam facientia hactenus delibavimus, ut legitimum rerum, quarum inevitabilis nobis semper intercedit necessitas, usum brevissimis subnectamus.

*Aér*, cuius prima cura esse debet, ei, quem supra cap. 6. de non naturalibus causis conceptui arcendo commodum diximus, sit contrari-

ns, videlicet eligatur purus, temperatus, à qualitatibus alienis immuni-  
nis, ad calidum & siccum inclinans, verno, juxta *Hippocratis* elogium,  
similis. Talis si non sit, arte concilietur ac conservetur. Vitetur fœ-  
tidus ac alioqui ingratus, nimis humidus, à ventis austrinis inquina-  
tus, nebulosus, frigidus.

*Cibus*, cùm juxta legitimæ methodi dictamen adsumptus, mul-  
tum conferat ad abigendam sterilitatem, in usum quotidianum traha-  
tur ἐν πεπλῷ καὶ ἐν χυμῷ, qui parum excrementitii secum occulit,  
alibilem spirituofumque sanguinem suppeditans, eoqué utatur ægra  
in quantitate modicâ, ne ventriculum gravet; in qualitate magis sic-  
câ, quam humidiiori; vitet lacticinia, farinacea, non fermentata, frixa,  
viscida, fumô indurata; item acida, pingvia, leguminosa, *verbō*: cru-  
da omnia. Hæc vel non, vel parcè mēnsæ adponantur. Horum loco ex-  
hibeantur carnes animalium juniorum delicatores, bubula de juvēne  
cum rad. pastinacæ cocta, consilio B. Rolfincii l.c. p. 895. caponum, gal-  
linarum, columbarum, perdicum, coturnicum, alaudarum, turdorum,  
rusticularum, attaginum, pisces saxatiles & gammari, quorum carnem  
ad excitandam Venerem inter alia commendat *Platerus* citante D.D.  
*Sachso*, *Gammalog* lib. 2. f. 2. c. 6. p. 770.

*Potus* sit cerevisia probè defecata, lupulō condita. Vino ad-  
svescat generoso, Hispanico, annoso. Rubrum præ albo eligendum  
monet *Cous*. Aquarum frigidarum, nivalium, palustrium aut glaci-  
alium usus penitus interdicendus.

*Somnum* & *Vigilias* quod concernit, in iis semper cavendum τὸ  
πολὺ. Ultraque enim nisi vices debitō tempore alternent seqve in-  
vicem sublevent, periculum minantur.

*Motus* & *Quies* justis temperentur mensuris. Præstat blan-  
dum & lenem anteponere vitæ sedentariae & quieti nimiæ, qua pluri-  
mas in corpore colliguntur impuritates & excrements; alvus quotidie  
suum faciat officium, si non, aptis solicitetur adminiculis. Mensum  
quoque ordinaria habenda ratio, ut in singulis debitè & cum ἐν Φορέᾳ  
pro ætatis, temperamenti, vitæque generis conditione naturæ fiat satis.

Tandem *animi pathemata*, rectæ rationis moderentur habenis, præ-  
sertim tristiora, quæ cane pejus & angve fugienda. Metus, odium, ira &  
tristitia longissimè abigenda, & ad Indos Garamantasq; releganda mo-

rositas. Omnia sint læta in concipiente, hilari animo expectet prolema. Severæ cogitationes, etsi bonæ, ut & solicitudines tunc temporis penitus exulent. Venus deinceps quomodo colenda, ne impudicis arem vellicemus, recensere supersedebimus. Plura qui desiderat; adçat B. Rolsinc. l. c. p. 897.

Atque hæc sunt, quæ de affectu maximè exosò & detestabili apud Veteres pro ingenii modulò adducere licuit, fatemur nonnulla præterita esse, nonnulla leyi tractata manu, sed cum *Autore Quintiliano*, studiorum quædam sit infantia, veniam speramus B.L. donec & ætatis & doctrinæ fructus maturiores meliora polliceri valebunt. Medicè hunc morbum tractavimus non Ethicè, quod si tecum perpenderas, facilem nobis veniam eris datus. Vale & hæc quod scripsimus, casto perlege animo.

## SOLI DEO GLORIA!

**D**E Sterili loqueris, sterili non semina reddis  
Doctrinæ: en fructus! contexta volumina filo  
Pœonio! Sunt grata Chironi, plaudit Apollo.  
Addo meum votum: Reddat tibi munera virtus!

Honoris ergo Nobil. & Clariss. Dn. Ddo scrib.

Frid. Bechmann D. P. P.

**N**on sterile ingenium Tua dissipatio docta  
arguit. Hinc praxis larga & fœcunda sequatur  
famaq; cum pleno fortuna & dñe cornu.

His Clarissimo Dno BERTUCHIO, Medicinæ Doctorando di-  
gnissimo gratulatur & felices successus adprecatur

Rud. Wilh. Krauß/Phil. & Med. D. P. P.

**H**actenus ingenii conceptus ubere fructu  
eximum peperit non sine laude decus.  
Jam fœcunda bonis largitur hygæa brabæ,  
pluraque mox spondet partus honoris apex.

Augeas tamen afflū facieb.

Georg. Wolffg. Wedelius D.

**B**ertuchi; virtus nunquam sterilescet, acumen  
Ingenii prorsus sterilitate caret.  
Cernis? ut auratam texat nunc fama coronam,  
Quam templi in medio fornice figat honor.

doctissimo Dn. Candidato gratulatur

Johannes Frischmuth/P. P.